

舊

唐

書

三二



唐書列傳卷第一百二十九

劉 昫

蕭溝 弟蘧

孔緯 子崇弼

韋昭度

崔昭緯

張濬

朱朴

鄭繁

劉崇望

兄崇龜 弟崇魯

徐彥若

父商 子綰

弟彥樞

陸辰

柳璨

弟瑛 瑒

蕭溝蘭陵人開元朝宰相太師徐國公嵩之四代孫嵩生衡衡生復德宗朝宰相復生湛湛生寘咸通中宰相寘生溝以咸通五年登進士第釋褐祕書省校書郎太原從事入朝爲右拾遺再遷起居舍人與韋保衡同年登進士第保衡以幸進無藝同年門生皆薄之溝形神秀偉志操不羣自比李德裕同年皆戲呼太尉保衡心銜之及保衡作相擠溝之失貶爲播州司馬途經三峽維舟月夜賦詩自悼慮保衡見害遽有神人謂之曰相公勿憂子常禦侮奉衛溝心異之過峽州經白帝祠即所觀之神人也保衡誅以禮部員外郎徵還轉考功員外郎知制誥乾符初召充翰林學士正

拜中書舍人累遷戶部侍郎翰林承旨黃巢犯闕僖宗出幸以供饋不給須近臣掌計改兵部侍郎判度支中和元年三月自褒中幸成都次綿州以本官同平章事加中書侍郎累兼吏部尚書監修國史講少負大節以經濟爲己任洎虜台司風望尤峻奏對朗拔天子器之光啓初王綱不振是時天下諸侯半出羣盜強弱相噬怙衆邀寵國法莫能制有李凝古者從支詳爲徐州從事詳爲衙將時溥所逐而賓佐陷於徐及溥爲節度使因食中毒而惡凝古者譖之云爲支詳報讎行酖溥收凝古殺之凝古父損時爲右常侍溥上章披訴言損與凝古同謀內官田令孜受溥厚賂曲奏請收損下獄中丞盧渥附令孜鍛鍊其獄侍御史王華嫉惡堅執奏證損無罪乃改奏多損罪狀獄按問王華拒不奉詔奏曰李損位居近侍當死安可辱辱於黃門之手溝非時進狀請開延英奏曰李凝古行酖之謀其事曖昧已遭屠害今不復論李損父子相別三四年音問斷絕安得誣罔同謀時溥恃勲壞法凌

蔑朝廷而抗表請按侍臣悖戾何其厚誣良善人皆痛心若李損  
羅織而誅行當便及臣等帝爲之改容損得免止於停任時田令  
孜專摠禁軍公卿寮庶無不候其顏色唯講以道自處未嘗屈降  
是年冬令孜奏安邑兩池鹽利請直屬禁軍王重榮上章論列  
乃奏移重榮別鎮重榮不受令孜請率禁軍討之重榮求援於太  
原李克用引軍赴之拒戰沙苑禁軍大敗逼京城僖宗懼出幸鳳  
翔諸藩上章抗論令孜生事離間方面講素惡令孜乃與裴澈致  
書召朱玫玫以邠州之軍五千迎駕仍與河中太原修睦請同匡  
王室由是諸鎮繼上章請駕還京令孜聞政軍至迫脅天子幸陳  
倉時僖宗蒼卒出城夜中百官不及扈從孜怒令孜弄權又以天  
子不諒其忠語辭怨望乃訴于講曰主上六年奔播百端艱險中  
原士庶與賊血戰肝腦塗地十室九空比至收復京都十亡七八  
殘民遺老方喜車駕歸宮主上不念生靈轉輸之勞甲士血戰之  
効將勤王之功業爲勅使之寵榮而更志在亂邦與國生事召戎

結怨不自他人昨奉指蹤徑來奔問不蒙見信翻類脅君古者忠而獲罪正如此也吾等報國之心極矣戰賊之力殫矣安能垂頭疊翼喘喘於閹寺之手哉春秋之義喪君有君相公徐思其宜改圖可也溝曰主上臨御十餘年未聞過行此來喪亂播越失於授任非才近年令改掣肘動不如意上每言之流涕不已昨去陳倉上無行意令改陳兵帳下列卒堦前造次迫行不容俟旦靜言此賊罪不容誅至尊之心孰不深鑒足下乃心王室止有歸兵還鎮拜表迎鑒德業功名益光圖史捨此已往理或未安改圖之言未敢聞命玫曰李家王子極多有天下者豈一王哉溝曰廢立危事雖有伊尹霍光之賢尚貽後悔古人云勿爲福始勿爲禍先如公矢謀未見其利玫退而宣言曰我冊箇王子爲主不從者斬及立襄王請溝爲冊文溝曰少嬰衰疾文思減落比來禁署未免倩人請命能者竟不措筆乃命鄭昌圖爲之玫滋不悅及還長安以昌圖代溝爲相署溝太子太保乃移疾滿百日退居河中之永樂縣溝

在相位五年累兼尚書右僕射進封楚國公僖宗再還京宰相孔  
緯與溝不協以其授僞命奏貶官尋賜死於永樂咸通中王鐸掌  
貢籍溝與韋保衡俱以進士中選而保衡暴貴與鐸同在中書及  
僖宗在蜀溝又與鐸並居相位帝嘗召宰臣鐸年高昇階足跣踣  
勾陳中溝旁掖起帝目之喜曰輔弼之臣和予之幸也謂溝曰適見  
卿扶王鐸子喜卿善事長矣溝對曰臣扶王鐸不獨司長臣應舉  
歲鐸爲主司以臣中選門生也上笑曰王鐸選進士朕選宰相於  
卿無負矣溝謝之而退溝爲大臣士行無缺逢時不幸爲僞愠所  
汚不以令終人士惜之弟遽時爲永樂令

孔緯字化文魯曲阜人宣尼之裔曾祖岑父位終祕書省著作佐  
郎諫議大夫巢父兄也祖戮位終禮部尚書自有傳父遵孺終華  
陰縣丞緯少孤依諸父溫裕溫業皆居方鎮與名公交故緯聲籍  
早達大中十三年進士擢第釋褐祕書省校書郎崔慎由鎮梓州  
辟爲從事又從崔鉉爲揚州支使得協律郎崔慎由鎮華州河中

緯皆從之歷觀察判官宰相楊收奏授長安尉直弘文館御史中丞王鐸奏爲監察御史轉禮部員外郎宰相徐商奏兼集賢直學士改考功員外郎丁內憂免服闋以右司員外郎入朝宰臣趙隱嘉其能文薦爲翰林學士轉考功郎中知制誥賜緋正拜中書舍人累遷戶部侍郎謝日面賜金紫之服乾符中罷學士出爲御史中丞緯器志方雅嫉惡如讎旣揔憲綱中外不繩而自肅歷戶部兵部吏部三侍郎居選曹動循格令權要有所託私書盈几不之省執政怒之改太常卿黃巢之亂從僖宗幸蜀改刑部尚書判戶部事宰臣蕭遘在翰林時與緯情旨不協至是因戶部取給不充移之散秩改太子少保光啓元年從駕還京是時田令孜軍敗沙陀逼京師帝移幸鳳翔帥朱玫引兵來迎駕令孜挾帝幸山南時中夜出幸百官不及扈從而隨駕者黃門衛士數百人而已帝駐寶雞候百官詔授緯御史大夫遣中使傳詔令緯率百寮赴行在時京師急變從駕官屬至盤厓並爲亂兵所剽資裝殆盡緯承

命見宰相論事蕭講裴徹以田令孜在帝左右意不欲行辭疾不見緯緯遣臺吏促百官上路皆以袍笏不具爲詞緯無如之何乃召三院御史謂之曰吾輩世荷國恩身居憲秩雖六飛奔迫而咫尺天顏累詔追徵皆無承稟非臣子之義也凡布衣交舊緩急猶相救卹況在君親策名委質安可背也言竟泣下三院曰夫豈不懷但整屋剝剝之餘乞食不給今若首途聊營一日之費俟信宿繼行可也緯拂衣起曰吾妻危疾且不保夕丈夫豈以妻子之故怠君父之急乎公輩善自爲謀吾行決矣即日見李昌符告曰主上再有詔命今促百寮前進觀羣公立意未有發期僕忝憲闡不宜居後道途多梗明公幸假五十騎送至陳倉昌符嘉之謂緯曰路無頓遞裹糧辦耶乃送錢五十緡令騎士援緯達散關緯知朱玫必蓄異志奏曰關城小邑不足以駐六師請速幸梁州翌日車駕離陳倉纔入關而郿岐之兵圍寶雞攻散關微緯之言幾危矣至虢中改兵部侍郎同中書門下平章事尋改中書侍郎集賢殿



大學士王行瑜斬朱玫平定京城遷門下侍郎監修國史從駕還京駐蹕岐陽進階特進兼吏部尚書領諸道鹽鐵轉運使車駕還宮進位左僕射賜持危啓運保乂功臣食邑四千戶食實封二百戶賜鐵券恕十死罪賜天興縣莊善和里宅各一區兼領京畿營田使僖宗晏駕充山陵使僖宗祔廟緯準故事不入朝昭宗遣中使召赴延英令緯依舊視事進加司空以國學盜火所焚令緯宗萇仍兼領國子祭酒蔡賊秦宗權伏誅進階開府儀同三司進位司徒封魯國公十一月昭宗謁郊廟兩中尉內樞密請朝服所司申前例中貴人無例朝服助祭之禮少府監亦無素製衣冠服中尉怒立令製造下太常禮院禮官舉故事亦稱無中尉朝服助祭之文諫官亦論之緯奏曰中貴不衣朝服助祭國典也陛下欲以權道寵內臣則請依所兼之官而爲之服天子召諫官謂之曰大禮日近無宜立異爲朕容之於是內官以朝服助祭郊禮畢進位兼太保大順元年夏幽州汴州請討太原宰臣張濬請自率禁軍爲招

討上持疑未決問計於緯緯以討之爲便語在濬傳其年秋濬軍  
爲太原所擊大敗而還濬罷相貶官緯坐附濬以檢校太保江陵  
尹荆南節度觀察等使未離闕下再貶均州刺史緯濬密遣人求  
援於汴州朱全忠上章論救緯至商州有詔俾令就便遂寓居華  
州乾寧二年五月三鎮入京師殺宰相韋昭度李谿帝以大臣朋  
黨外交方鎮思用骨鯁正人遣中使趨華州召緯入朝以疾未任  
上路六月授太子賓客其日之夕改吏部尚書翌日拜司空兼門  
下侍郎同平章事太清宮使修奉太廟弘文館大學士延資庫使  
階爵功臣名食邑並如故旬日之內駟騎敦促相望于路扶疾至  
京師延英中謝奏曰臣前時待罪宰相智術短淺有負弼諧陛下  
特貸刑書曲全腰領臣期於死報泉壤不望生叩玉階復拜龍顏  
實臣榮幸然臣比嬰衰疾伏枕累年形骸雖存生意都盡平居勉  
強御事猶踈況比疴羸寧勝重委國祚方泰英彥盈庭豈以朽腐  
之人再塵機務臣力疾一拜殿庭乞陛下許臣自便因嗚咽涕泣

緯久疾拜蹈艱難上令中使止之改容軫念令閤門使送緯中書視事不旬日沙陀次河中同州王行約入京師謀亂天子出幸石門緯從駕至莎城疾漸危薦先還京城九月卒於光德里第贈太尉緯家尚節義挺然不屈雖權勢燠灼未嘗假以恩禮大順初天武都頭李順節恃恩頗橫不替年領浙西節度使俄加平章事謝曰臺吏申中書稱天武相公衙謝準例班見百寮緯判曰不用立班順節麤暴小人不開朝法盛飾趨中書既見無班心甚怏怏他日因會順節微言之緯曰必知公慊也夫百辟卿士天子庭臣也比來班見宰相以輔臣居班列之首奉長之義也公握天武健兒而於政事廳受百寮班見意自安乎必若須此儀俟去都頭二字可也順節不敢復言其秉禮不回多此類也孔氏子元和後昆仲貴盛至正卿方鎮者六七十未有爲宰相者至緯始在鼎司子崇弼亦登進士第仕至散騎常侍

韋昭度字正紀京兆人祖緡父逢昭度咸通八年進士擢第乾符

中累遷尚書郎知制誥正拜中書舍人從僖宗幸蜀拜戶部侍郎  
中和元年權知禮部貢舉明年以本官同平章事兼吏部尚書昭  
宗即位閬州刺史王建攻陳敬瑄於成都隔絕貢奉乃以昭度檢  
校司空同平章事成都尹劔南西川節度招撫宣慰等使昭度赴  
鎮敬瑄不受代詔東川顧彥朗與王建合勢討之昭度爲行營招  
討卒歲止拔漢州王建謂昭度曰相公勞師弊衆遠事疆夷訪聞  
京洛以東羣侯相噬禍難未已朝廷不治腹心之疾也相公宜亟還  
京師咨謀匡合平定兩河國家之利也敬瑄小醜以日月制之擒之  
必矣此事責建可辦昭度然之奏請還都昭度未及京師建以重  
兵守劍門急攻成都下之殺敬瑄自稱留後昭度還以檢校司空  
充東都留守召還爲右僕射景福二年冬宰相杜讓能爲鳳翔所  
殺復委昭度知政事與李谿並命時宰相崔昭緯專政惡李谿之  
爲人降制日令知制誥劉崇魯哭麻以沮之谿上表論列天子待谿  
益厚明年春復命谿同平章事昭緯不勝其忿先是邠州王行瑜

求爲尚書令昭度奏議云國朝已來功如郭子儀未省曾兼此官  
乃賜號尚父崔昭緯宗人鋌曾爲行瑜從事朝廷每降制勅不便  
於昭緯者即令鋌訴於行瑜俾上章論列朝曰小有依違即表章  
不遜至是李谿入拜昭緯謂鋌曰前時尚父之命已行而昭度沮之  
今又引谿同列此人姦纖惑上視聽宗社不寧恐復有杜太尉之事  
行瑜與李茂貞上章言命相非其人懼危宗社天子優詔曉諭言  
谿有才其年五月行瑜茂貞華州韓建以兵入觀面奏昭度李谿  
之姦邪請加譴逐制勅未行三鎮兵害昭度於都亭驛及行瑜誅  
降制復其官爵令其家收葬

崔昭緯清河人也祖庇滑州酸棗縣尉父瑋鄂州觀察使昭緯進  
士及第昭宗朝歷中書舍人翰林學士戶部侍郎同平章事性姦  
纖忌前達內結中人外連藩閫屬朝廷微弱每託援以凌人主昭  
宗明察心不能堪以誘召三鎮將兵誼闢賊殺宰相內臣帝深切  
齒會太原之師誅行瑜罷相授右僕射復又以託附汴州再貶梧

州司馬尋降制曰崔昭緯頃居內署粗著微勞擢於侍從之司委以燮調之任不能忠貞報國端愼處身潛交結於姦臣致漏卮於機事星霜累換匡輔蔑聞爾罪一也又使其私忿輒恣陰謀託崔鋌之險巖連行瑜之計畫遂致稱兵向闕怙衆脅君故宰臣韋昭度李錡並以無辜見害幾危宗社顯辱君親爾罪二也及行瑜敗滅京國甫安而乃自懼欺誣別謀託附又於藩閫潛請薦論不唯苟免罪愆兼亦再希任用貪榮冒寵僭濫無狀敗俗傷風賢愚共鄙爾罪三也又將厚賂欲結諸王輕侮我憲章玷瀆我骨肉貨財之數文字具存賴諸王作朕腹心嫉其蠹害盡將昭緯情款兼其親吏姓名直具奏聞拒其求託昭緯曾居宰輔久歷清崇但欲逞其回邪都不顧其事體觀其識見實駭聽聞爾罪四也自茲邪既露情狀難容尚示寬刑未行嚴憲投于荊裔冀其自新而不能退省過尤恭承制命速赴貶所用守常規而猶自務宴安尋聞所在留駐攪擾藩鎮侮慢朝章曾無稟更之心可驗苞藏之計罔知僇

各唯謗朝廷爾罪五也朕以恩澤者帝王之雨露刑法者邦國之雷霆無雨露則庶物不榮無雷霆則萬邦不肅朕體天道以化育遵王度以澄清罪既昭彰理難含垢凡百多士宜體予懷宜所在賜自盡時昭緯行次至荆南中使至斬之兄昭符仕至禮部尚書昭愿太子少保昭矩給事中昭遠考功員外郎

張濬字禹川河間人祖仲素位至中書舍人父鐸官卑家寓州濬倜儻不羈涉獵文史好大言為士友之所擯弃初從鄉賦隨計咸薄其為人濬憤憤不得志乃田衣野服隱於金鳳山學鬼谷縱橫之術欲以捭闔取貴仕乾符中樞密使楊復恭因使遇之自處士薦為太常博士累轉度支員外郎黃巢將逼關輔濬託疾請告侍其母挈族避亂商州賊犯京師僖宗出幸途無供須衛軍不得食漢陰令李康獻糗餌數百騾綱軍士始得食僖宗召康問曰卿為縣令安操心及此康對曰臣為鹿吏敢有此進獻張濬員外教臣也帝異之急召至行在拜兵部郎中未幾拜諫議大夫其年冬宰

相王鐸至滑臺兼充天下行營都統方徵兵諸侯奏用濬爲都統判官時王敬武初破弘霸郎軍威大振累詔徵平盧兵敬武獨不赴援鐸遣濬往說之敬武已受僞命復怙強不迎詔使濬至謁見責之曰公爲天子守藩王臣齎詔宣諭而侮慢詔使旣未識君臣禮分復何顏以御軍民哉敬武愕然謝咎旣宣詔軍士按兵默然濬並召將佐集於鞠場面諭之曰人生效忠仗義所異粗分逆順懸知利害黃巢前日販鹽虜耳公等捨累葉天子而臣販鹽白丁何利害之可論耶今諸侯勤王天下響應公等獨據一州坐觀成敗賊平之後去就何安若能此際排難解紛陳師鞠旅共誅寇盜迎奉靈輿則富貴功名指掌可取吾惜公輩捨安而即危也諸將改容引過謂敬武曰諫議之言是也即時出軍從濬入援京師賊平累遷戶部侍郎僖宗再幸山南拜平章事判度支濬初發迹依楊復恭及復恭失勢乃依田令孜以至重位而反薄復恭及再幸山南復恭代令孜爲中尉罷濬知政事昭宗初在藩邸深嫉宦官復



恭有援立大勲特恩任事上心不平之當時趨向者多言濬有方略能畫大計復用爲宰相判度支上嘗問濬致理何事最急對曰莫若強兵兵強而天下服上繇是專務蒐補兵甲欲以武功勝天下後延英論前代爲治得失濬曰不必遠徵漢晉之弊臣竊見陛下春秋鼎盛英睿如此內外偏於強臣每思之實痛心而泣血也會朱全忠誅秦宗權安居受殺李克恭以潞州降全忠幽州李匡威雲州赫連鐸等奏請出軍討太原詔四品已上官議皆言國祚未安不宜生事假如得太原亦非國家所有濬議曰先帝頻至播越王室不寧原其亂階由克用全忠之矛盾也請因其奏乘全忠立功可斷兩雄之勢上曰收復之功克用第一今乘其危困而加兵諸侯其謂我何濬懇論用兵之利害蓋欲示外勢而擠復恭也上曰未決宰臣孔緯曰張濬所陳萬代之利也陛下所惜即目之利也以臣所料師渡河而賊必自破昨計度軍中轉餉犒勞一二年間必無闕事陛下斷意行之旣二相俱論乃以濬爲河東行營

兵馬都招討宣慰使以京兆尹孫揆副之仍授揆昭義節度使華州韓建爲供軍使朱全忠爲太原西南面招討使李匡威赫連鐸爲太原東北面招討使全忠以汴軍三千爲濬牙隊大順元年六月濬率軍五十二都兼邠寧鄜夏雜虜共五萬人騎發自京師昭宗御安喜樓臨送濬酒酣泣奏曰陛下動爲賊臣掣肘臣所以誓死憤惋爲陛下除其僭偏楊復恭聞之不悅中尉內使餞於長樂復恭奉卮酒屬濬濬辭曰聖人賜酒已醉矣復恭戲曰相公握禁兵擁大旆獨當一面不領復恭意作面子耶濬笑曰賊平之後方見面子復恭銜之時汴華邠岐之師渡河會濬於晉州汴將朱崇節權知潞州事太原將李存孝攻之濬慮賊平汴人據昭義乃令孫揆分兵赴鎮中使韓歸範送旌節至軍八月揆與歸範赴潞州至路並爲存孝擒送太原九月汴將葛從周奔潞州十月濬軍至陰地邠岐華三鎮之師營平陽李存孝擊之一戰而敗委兵仗潰散進攻晉州數日中夜濬斂衆遁走比曙喪師殆半存孝進收晉

絳礪隰等州濬狼狽由含山踰王屋出清河圻屋木縛筏濟河部下離散將盡李克用上章論訴曰晉州長寧關使張承暉於當道錄到張濬榜并詔曰張濬充招討制置使令率師討臣兼削臣屬籍官爵者臣誠冤誠憤頓首頓首伏以宰臣張濬欺天蔽日廊廟不容讒臣於君奪臣之位憑燕帥妄奏與汴賊結恩矯託皇威擅宣王命徵集師旅撓亂乾坤悞陛下中興之謀資黔黎重傷之困臣實何罪而陛下伐之此則宰臣持權面欺陛下沉臣父子二代受恩四朝破徐方救荆楚收鳳闕碎梟巢致陛下今日冠通天之冠佩白玉之璽臣之屬籍懿皇所賜臣之師律先帝所命臣無逆節濬討何名陛下若默逐功臣欲用文吏自可遷臣封邑以侯就第柰何加諸其罪孰肯無詞若以臣雲中之伐獲罪於時則拓拔思恭取鄜延朱全忠侵徐鄆陛下何不討之假令李孝德不忠於主伐之爲是則朱瑄時溥有何罪耶此乃同坐而異名賞彼而誅此使天下藩服強者扼腕弱者自動休言竊議爲臣怨嗟固非中興之

術也且陛下卽危之秋則獎臣爲韓彭伊霍旣安之後罵臣曰戎  
羯蕃夷海內握兵立事如臣者者衆矣寧不懼陛下他時之罵哉  
臣昨遇燕軍以禮退舍臣威淺昧厚自矜誇乃言臣中矢石覆土  
卒致內外吠聲一發短謀競陳悞陛下君臣之分況命官選將自  
有典刑不必幸臣之弱而後取之儻臣延期挺命尚固一方彼實  
何顏以見陛下此則姦邪朋黨輕弄邦典陛下凝旒端扆何由知  
之今張濬旣以出軍微臣固難束手臣便欲叫閭輕騎面叩玉階  
訴邪佞於陛下之彤墀納詔命於先皇之宗廟然後束身司敗甘  
處憲章時克用今所擒中使奉表表至而濬敗朝廷震制曰漢  
武因恭儉富庶之後建置朔方孫弘沮之十不得二而良史以弘有  
宰相體者誠以愛人治國爲先拓境開疆爲末及孝宣值雄才削  
平之餘將議北征魏相爭之五將尋罷果致中興號爲賢輔況朕  
承天厭兵戈之後人思休息之時敢望臯蔓共成堯日庶幾孫魏  
粗及漢年苟易於斯如何倚注光祿大夫門下侍郎兼戶部尚書

同中書門下平章事上柱國清河郡開國伯食邑一千二百戶充河東行營諸道兵馬招討制置等使張濬早以盛名稱爲奇士繇是再加徵用委以鈞衡謂其必致小康克勝大任而乃罔思守道但欲邀功用不詭之詢謀起無名之兵革自云一舉止在旬時堅請抗論勢莫能奪輕葛亮渭濱之役小裴度淮右之行經歷寒暄耗費百萬虛誕彰于朝野詐詭布於華夷橫草蔑聞燎原愈急俾擁旄乘駟之使囚在虜庭勤王奉國之軍懷歸本土忘廊廟之威重結藩屏之仇讎欲使海內生靈竭其貢賦不獨河中郡邑蕩爲丘墟潛生厲階欲誰歸咎於戲徵晁錯之故事思王恢之舊章國有明文爾當何道尚以愛人以禮理體宜然廉鎮劇權武昌善地宜罷樞軸之務仍停支度之司勉自思惟以逃後命可檢校戶部尚書鄂州刺史武昌軍節度觀察等使尋貶連州刺史馳驛發遣行至藍田關不行留華州依韓建時朝廷微弱竟不能詰乾寧二年三鎮殺韋昭度帝召孔緯欲大用亦以濬爲兵部尚書又領天下

租庸使三年天子幸華州罷濬使務守尚書右僕射上疏乞致仕授左僕射致仕乃還洛陽居於長水縣別墅濬雖退居山野朝廷或有得失必章疏上言德王廢立之際濬致書諸蕃請圖匡復王師範青州起兵欲取濬爲謀主事雖不果其迹頗泄朱全忠將圖篡代懼濬構亂四方不欲顯誅密諷張全義令圖之乃令牙將楊麟率健卒五十人有如劫盜圍其野墅而殺之天復三年十二月晦夜也永寧縣吏葉彥者張氏待之素厚楊麟之來彥知之告濬第二子格曰相公之禍不可免耶君宜自爲謀格濬父子號咷而已濬謂格曰留則併命去或可免汝自圖之勿以吾爲累翼存後祀也格拜辭而去葉彥率義士三十人送渡漢江而旋格由荆江上峽入蜀王建僭號用爲宰相中興平蜀任園樵格而還格感葉彥之惠訪之身已歿而厚報其家濬第三子竄於楊行密自乾寧之後賊臣內侮王室帝微昭宗不堪凌弱欲簡拔奇材以爲相然採於群小之論未嘗獲一名人登用之徒無不爲時嗤謂有

朱朴者乾寧中爲國子博士腐儒木強無他才伎道士許巖士出入禁中嘗依朴爲姦效利從容上前薦朴有經濟才昭宗召見對以經義甚悅即日拜諫議大夫平章事在中書與名公齒筆札議論動爲笑端數月巖士事敗俱爲韓建所殺

鄭縈者以進士登第歷監察殿中倉戶二員外金刑右司三郎中家貧求郡出爲廬州刺史黃巢自嶺表還經淮南剽掠縈移黃巢文牒請不犯郡界巢笑而從之一郡獨不被寇天子嘉之賜緋魚袋罷郡有錢千緡寄州帑後郡數陷盜不犯鄭使君寄庫錢至楊行密爲刺史送所寄於京師還縈縈善爲詩多侮劇刺時故落格調時號鄭五歇後體初去廬江與郡人別云唯有兩行公廨淚一時灑向渡頭風滑稽皆此類也王徽爲御史大夫奏縈爲兵部郎中知臺雜遷給事中賜金紫僖宗自山南還以宰相杜讓能弟弘徽爲中書舍人縈以弘徽兄在中書弟不宜同居禁近封還制書天子不報縈即移病休官無幾以左散騎常侍徵還朝政有關無

不上章論列事雖不行喧傳都下執政惡之改國子祭酒物議以  
縻匡諫而置之散地不可執政懼復用為常侍光化初昭宗還宮  
庶政未愜縻每形於詩什而嘲之中人或誦其語於上前昭宗見其  
激訐謂有蘊蓄就常奏班簿側注云鄭縻可禮部侍郎平章事中  
書胥吏詣其家叅謁縻笑而問之曰諸君大悞俾天下人並不識字  
宰相不及鄭五也胥吏曰出自聖旨特恩來日制下抗其手曰萬  
一如此笑殺他人明日果制下親賓來賀搔首言曰歇後鄭五作  
宰相時事可知矣累表遜讓不獲既入視事侃然守道無復詼諧  
終以物望非宜自求引退三月餘移疾乞骸以太子少保致仕光化  
二年卒時議以昭宗命台臣潘朴縻三人尤謬季末之妖也

劉崇望字希徒其先代郡人隋元魏孝文帝徙洛陽遂為河南人  
八代祖隋大理卿坦生政會輔太宗起義晉陽官至戶部尚書封  
渝國公圖形凌煙閣政會生玄意尚太宗女南平公主歷洪饒八州  
採訪使玄意生竒位至吏部侍郎竒生慎知仕至獲嘉令慎知生



駁仕至東阿令駁生范傑位終祕書郎傑生符進士登第咸通中位終蔡州刺史生八子崇龜崇崇望崇崇魯崇崇墓最知名崇龜咸通六年進士擢第累遷起居舍人禮部兵部二員外丁母憂免廣明元年春鄭從謹罷相鎮太原奏崇龜爲度支判官檢校吏部郎中御史中丞賜金紫中和三年入朝爲兵部郎中拜給事中大順中遷左散騎常侍集賢殿學士判院事改戶部侍郎檢校戶部尚書出爲廣州刺史清海軍節度領南東道觀察處置等使卒崇望咸通十五年登進士科王凝廉問宣歙辟爲轉運巡官戶部侍郎裴坦領鹽鐵辟爲叅佐崔安潛鎮許昌成都在崇望比仲四人皆在安潛幕下入爲長安尉直弘文館遷監察御史右補闕起居郎弘文館學士轉司勳吏部二員外郎崔安潛爲吏部尚書崇望判南曹滌除宿弊復清選部田令孜干政藩鎮怨望河中尤甚不修職貢僖宗在山南以蒲坂近關欲其效用選使諭旨以崇望爲諫議大夫既至諭以大義重榮奉詔恭順誓心匡復請殺朱玫自贖使還上

悅召入翰林充學士累遷戶部侍郎承旨轉兵部在禁署四年昭宗即位拜中書侍郎同平章事累兼兵部吏部尚書大順初同列張濬畫策計太原崇望以爲不可濬果敗濬黜崇望代爲門下侍郎監修國史判度支明年玉山都頭楊守信協楊復恭稱兵闕下陣于通化門上陳兵於延嘉門是夜命崇望守度支庫明日曉入含光門未開門內禁軍列于左右俟門開即劫掠兩市及聞傳呼宰相來門方啓崇望駐馬慰諭之曰聖上在街東親總戎事公等禁軍何不樓前殺賊立取功名切不可剽掠街市圖小利以成惡名也將士唯唯從崇望至長樂門守信見兵來即遁去軍士呼萬歲是日庫市獲全軍人不亂繫崇望之方略也尋加左僕射時溥與朱全忠爭衡全忠謀兼徐泗上表請以重臣鎮徐乃以崇望守本官充武寧軍節度使溥不受代行至華陰而還拜太常卿王重盈死王珂王珙爭河中節鉞朝廷以宰相崔涓爲河中節度使珂李克用之子皆也河東進奏官薛志勤揚言曰崔相雖重德如

作鎮河中代王珂不如光德劉公於我公事素也及三鎮以兵入朝殺害大臣以志勤之言責授崇望昭州司馬及王行瑜誅太原上表言崇望無辜放逐時已至荆南有詔召還拜吏部尚書未至王溥再知政事兼吏部尚書乃改崇望兵部尚書時西川侵寇顧彥暉欲併東川以崇望檢校右僕射平章事梓州刺史劍南東川節度使未至鎮召還復爲兵部尚書光化二年卒時年六十二冊贈司空崇魯廣明元年登進士第鄭從讜奏充太原推官時兄崇龜爲節度判官昆仲同居幕府尋轉掌書記中和三年入朝拜右拾遺左補闕景福初以水部員外郎知制誥二年杜讓能得罪昭宗復命韋昭度爲相翰林學士李谿同平章事崇魯與崔昭緯相善昭緯恃邠岐之援讓能既誅之後權歸於已昭宗師李谿爲文懼居位得寵則恩顧漸衰乃私與崇魯謀沮之及谿宣制之日出班而哭謂昭緯曰朝廷雖乏賢不可用纖人爲宰輔谿比依復恭重遂居內職前日杜太尉狼籍爲朝廷深恥今則削弱如此安

可更遵覆轍乎由是谿命不行谿自十一月初至歲暮聯上十表  
訴冤其詞詆毀所不忍聞明年春復命谿爲平章事昭緯召李  
茂貞王行瑜韓建稱兵入朝殺昭度與谿其年太原誅王行瑜昭緯  
貶官崇魯坐貶崖州司戶初崇龜在外聞崇魯哭麻大恚數日不  
食謂所親曰吾家兄弟進身有素未嘗以聲利敗名吾門不幸生此  
等兒崇謨中和三年進士及第乾寧末爲太常少卿弘文館直學士  
徐彥若天后朝大理卿有功之裔曾祖宰祖陶父商三世繼登進  
士科商字義聲大中十三年及第釋褐祕書省校書郎累遷侍  
御史改禮部員外郎尋知制誥轉郎中召充翰林學士拜中書舍  
人戶部侍郎判本司事檢校戶部尚書襄州刺史山南東道節度  
等使入爲御史大夫咸通初加刑部尚書充諸道鹽鐵轉運使遷  
兵部尚書東茅子食邑五百戶四年以本官同平章事六年罷相  
檢校右僕射江陵尹荆南節度觀察等使入爲吏部尚書累遷太  
子太保卒彥若咸通十二年進士擢第乾符末以尚書郎知制誥

正拜中書舍人昭宗即位遷御史中丞轉吏部侍郎檢校戶部尚書代李茂貞爲鳳翔隴節度使茂貞不受代復拜中丞改兵部侍郎同平章事進加中書侍郎累兼左僕射監修國史扈昭宗石門還宮加開府儀同三司司空進封齊國公太清宮修奉太廟等使加弘文館大學士賜扶危匡國致理功臣名昭宗自華還宮進位太保門下侍郎時崔胤專權以彥若在上欲事權萃於其門二年九月以彥若檢校太尉同平章事廣州刺史清海軍節度嶺南東道節度等使卒于鎮第彥樞位至太常少卿子縮天祐初歷司勳兵部二員外戶部兵部二郎中

陸展字祥文本名允迪吳郡人徙家于陝今爲陝州人曾祖禮位終殿中侍御史祖師德淮南觀察支使父鄠陝州法曹叅軍展光啓二年登進士第其年從僖宗幸興元九月宰相韋昭度領鹽鐵奏爲巡官明年宰相孔緯奏直史館得校書郎尋丁母憂免龍紀元年冬召授藍田尉直弘文館遷左拾遺兼集賢學士中丞柳玭奏改

監察御史大順二年三月召充翰林學士改屯田員外郎賜緋景福元年加祠部郎中知制誥二年元日朝賀面賜金紫之服五月拜中書舍人扈文思敏速初無思慮揮翰如飛文理俱愜同舍服其能天子顧待特異賞金鑾作賦命學士和扈先成帝覽而嗟挹之曰朕聞貞元時有陸贄吳通玄兄弟能作內廷文書後來絕不相繼今吾得卿斯文不墜矣乾寧初轉戶部侍郎二年改兵部進階銀青光祿大夫嘉興男三百戶三年正月宣授學士承旨尋改左丞其年七月改戶部侍郎同平章事故事三署除拜有光署錢以宴舊僚內署即無斯例扈拜輔相之月送學士光院錢五百貫特舉新例內署榮之八月加中書侍郎集賢殿大學士判戶部事九月覃王率師送徐彥若赴鳳翔師之起也扈堅請曰播越之後國步初集不宜與近輔交惡必爲他盜所窺加以親王統兵物議騰口無益於事祇貽後患昭宗已發兵怒扈沮議是月十九日責授硤州刺史師出果敗車駕出幸四年二月復授扈工部尚書八月轉兵部尚書從昭宗自華還宮明

年正月復拜中書侍郎同平章事光化三年四月兼戶部尚書進封  
吳郡開國公食邑一千戶九月轉門下侍郎監修國史天復元年五  
月進階特進兼兵部尚書加食邑五百戶車駕自鳳翔還京赦後諸  
道皆降詔書獨鳳翔無詔屢奏曰鳳翔近在國門責其心迹罪實  
難容然比來職貢無虧朝廷未與之絕一朝獨無詔即示人不庸也  
崔胤怒奏貶屢沂王傅分司東都削階至正議大夫居無何崔胤  
誅復授吏部尚書階封如故從昭宗還洛其年秋昭宗遇弒明年  
五月責授濮州司戶與裴樞崔遠獨孤損等被害於滑州白馬驛  
時年五十九子璨後爲緱氏令

柳璨河東人曾祖子華祖公器僕射公綽之再從弟也父遵璨少孤貧好  
學僻居林泉晝則採樵夜則燃木葉以照書性害直無緣飾宗人壁珙  
貴仕於朝鄙璨朴鈍不以諸宗齒之光化中登進士第九精漢史魯國顏  
蕘深重之蕘爲中書舍人判史館引爲直學士璨以劉子玄所撰史通譏  
駁經史過當璨紀子玄之失別爲十卷號柳氏釋史學者伏其優贍遷

左拾遺公卿朝野託爲歲奏時譽自洽以其博奧目爲柳篋子昭宗好文初寵待李谿頗厚洎谿不得其死心常惜之求文士似谿者或薦璨高才召見試以詩什甚喜無幾召爲翰林學士崔胤得罪前一日召璨入內殿草制勅胤死之日旣夕璨自內出前驅傳呼相公來人未見制勅莫測所以翌日對學士上謂之曰朕以柳璨竒特似可獎任若令預政事宜授何官承旨張文蔚曰陛下拔用賢能固不拘資級恩命高下出自聖懷若循兩省遷轉拾遺超等入起居郎臨大位非宜也帝曰超至諫議大夫可乎文蔚曰此命甚愜即以諫議大夫平章事改中書侍郎任人之速古無茲例同列裴樞獨孤損崔遠皆宿素名德遽與璨同列意微輕之璨深甚患之昭宗遷洛諸司內使宿衛將佐皆朱全忠腹心也璨皆將迎接之以恩厚相交結故當時權任皆歸之二年五月西北長星竟天掃太微文昌帝座諸宿全忠方謀篡代而妖星謫見占者云君臣俱災宜刑殺以應天變蔣玄暉張延範謀殺衣冠宿望難制者璨即首跡素所不快者三十餘人相次誅殺班行爲之一空冤聲載路傷害旣甚



朱全忠心惡之會全忠授九錫蔣玄暉等別陳意見王殷至大梁誣玄暉等通導宮掖欲興復李氏全忠怒捕廷範令河南聚衆五車分裂之兼誅璨臨刑呼曰負國賊柳璨死其宜矣初璨遷洛後累兼戶部尚書守司空進階光祿大夫鹽鐵轉運使其弟瑀瑒坐璨笞死史臣曰嗚呼李氏之失馭也字沴之氣紛如仁義之徒殆盡狐鳴鴟嘯瓦解土崩帶河礪獄之門寂無珥珪奮挺揭竿之類唯効敦玄手未捨於棘矜心已萌于問鼎加以囂浮士子闢茸鯁儒昧管葛濟時之才無王謝扶顛之業邀功射利陷族喪邦濬緯養虎於前宵璨剥廬於後遂徐薛於瘴海置縈朴於巖廊殿廷有哭制之夫輔弼走破輿之黨九疇旣紊百怪斯呈木將朽而蠹蝨生厲旣篤而蔓魑見妖徒若此亡國宜然何必長星更臨衰運

贊曰蕭召朱玫孔符張潛身世罹殃邦家起釁如木斯蠹自潰於中抵巇侮亂安責於我

唐書列傳卷第一百二十九 左奉議郎元紹興府府學教授朱倬校正

唐書列傳卷第一百三十

劉

昉

等修

朱克融

李載義

楊志誠

吳元忠

張仲武

子直方

張允伸

張公素

李可舉

李全忠

子匡威

匡籌

朱克融賊此之從孫也祖滔父涇克融少爲幽州軍校事節度使  
劉總總將歸朝慮其有變籍軍中素有異志者薦之闕下時克  
融亦在籍中宰相崔植杜元穎不知兵且無遠略謂兩河無虞遂  
奏勒歸鎮長慶初幽州軍亂囚其帥張弘靖時涇發疾於家軍中  
素伏其謀略至是衆欲立之涇自以老且病推克融統軍務焉朝  
廷尋加檢校左散騎常侍授以符節寶曆二年遣使送方鎮及三  
軍時服克融怒所賜踈弱執中使以聞上特優容別命中使宣諭  
仍改賜衣物派其使楊文端等先是克融執中使奏稱竊聞陛下  
欲幸東都請將兵馬并丁匠五千人修理官闕迎候車駕又上言

無衣擬於朝廷請三十萬端正以備一歲所費不然則三軍不安天子怒其悖慢取宰相裴度謀優容之語見別卷克融官至檢校司空吳興郡王其年五月本州軍亂殺之子延齡亦遇害次子延嗣竊立尋爲大將李載義所殺

李載義字方穀常山愍王之後代以武力稱繼爲幽州屬郡守載義少孤與鄉曲之不令者遊有勇力善挽強角觝劉濟爲幽州節度使見而偉之致於親軍從征伐以功遷衙前都知兵馬使檢校光祿大夫兼監察御史寶曆中幽師殺朱克融其子延嗣竊襲父位不遵朝旨虐用其人載義遂殺之數其罪以聞敬宗嘉之拜檢校戶部尚書兼御史大夫封武威郡王充幽州盧龍等軍節度副大使知節度事未幾李同捷據滄景以邀襲父爵載義上表請討同捷以自効上嘉其誠懇特加檢校右僕射累破賊軍以功加司空進階金紫大和三年平滄景策勲加平章事仍賜實封三百戶四年奚寇邊以兵擊走之仍虜其名王就加太保五年春爲其

部下楊志誠所逐因入覲上以載義有平滄景之功又能恭順朝  
旨冊拜太保同平章事其年改山南西道節度觀察等使兼興元  
尹七年遷北都留守兼太原尹充河東節度觀察處置等使尋加  
開府儀同三司丁母憂起復驃騎大將軍餘如故迴鶻每遣使入  
朝所至強暴邊城長吏多務苟安不敢制之以法但嚴兵防守虜  
益驕悍或突入市肆暴橫無所憚至是有迴鶻將軍李暢者曉習  
中國事知不能以法制馭益驕恣鞭捶驛吏貪求無已載義因召  
李暢與語曰可汗使將軍朝貢以固舅甥之好不當使將軍暴踐  
中華今朝廷饗餼至厚所以禮蕃客也苟有不至吏當坐死若將  
軍之部伍不戢凌侮上國剽掠廬舍載義必殺為盜者將軍勿以  
法令可輕而不戒勵之遂罷防守之兵而使兩卒司其門虜知其  
不為下無敢犯今九年加侍中開成二年卒年五十贈太尉載義  
晚年驕恣慘暴一方以楊志誠復為部下所逐過太原載義躬自  
歐擊遂欲殺之賴從事救解以免然而擅殺志誠之妻孥及將卒

朝廷錄其功曲法不問

楊志誠大和五年爲幽州後院副兵馬使事李載義時朝廷賜載義德政碑文載義延中使擊鞠志誠亦與焉遂於鞠場叫呼謀亂載義奔于易州志誠乃爲本道馬步都知兵馬使文宗聞之驚急召宰臣時牛僧孺先至上謂曰幽州今日之事可奈何僧孺曰此不足煩聖慮臣被召疾趨氣促容臣稍緩息以對上良久曰卿以爲不足憂何也僧孺對曰陛下以范陽得失繫國家休戚耶且自安史之後范陽非國家所有前時劉總向化以土地歸闕朝廷約用錢八十萬貫而未嘗得范陽尺布斗粟上供天府則今日志誠之得猶前日載義之得也陛下但因而撫之亦事之宜也且范陽國家所賴者以其北捍突厥不令南寇今若假志誠節鉞惜其土地必自爲力則爪牙之用固不計於逆順臣固曰不足煩聖慮上大喜曰如卿之言吾洗然矣尋以嘉王運遙領節度以志誠爲節度觀察留後檢校左散騎常侍兼幽州左司馬尋改檢校工部尚書節

度副大使知節度事七年轉檢校吏部尚書詔下進奏官徐迪誦中書白宰相曰軍中不識朝廷體位只知自尚書改僕射爲遷何知工部轉吏部爲美且軍士盛飾以待新恩一旦復爲尚書軍中必慚今中使往彼其勢恐不得出及使至其廉奔還奏曰楊志誠怒不得僕射三軍亦有怨言春衣使魏寶義兼他使焦奉鸞尹士恭並爲志誠繫留矣志誠遣將王文穎謝恩并讓官復賜官告批荅文穎不受而歸朝廷納裴度言務以合垢下詔諭之因再遣使加尚書右僕射八年爲三軍所逐而立史元忠元忠進志誠所造袞龍衣一副及被服鞍轡皆繡飾鸞鳳日月之形或爲王字因付御史臺按問沅嶺南行至商州殺之初元忠旣逐志誠詔以通王渾遙領節度授元忠左散騎常侍幽州大都督府左司馬知府事充節度留後明年轉檢校工部尚書節度副大使知節度事後爲偏將陳行泰所殺

張仲武范陽人也仲武少業左氏春秋擲筆爲薊北雄武軍使

會昌初陳行泰殺節度使史元忠權主留後俄而行泰又爲次將張絳所殺令三軍上表請降符節時仲武遣軍吏吳仲舒表請以本軍伐叛上遣宰臣詢其事仲舒曰絳與行泰皆是遊客主軍人心不附仲武是軍中舊將張光朝之子年五十餘兼曉儒書老於戎事性抱忠義願歸心闕廷李德裕因奏陳行泰張絳皆令大將上奏邀求節旄所以必不可與今仲武上表布誠先陳密款因而拔用即似有名許之乃授兵馬留後詔撫王紘遙領節度尋改仲武節度副大使知節度事檢校工部尚書幽州大都督府長史兼御史大夫蘭陵郡王俄而迴鶻擾邊時迴鶻有將勒那頡啜擁赤心宰相一族七千帳東逼漁陽仲武遣其弟仲至與裨將游奉靈王如清等率銳兵三萬人大破之前後收其侯王貴族千餘人降三萬人獲牛馬橐駝旗纛器幕不可勝計遣從事李周瞳牙門將國從玘相次獻捷詔加檢校兵部尚書兼東面招撫迴鶻使先是奚契丹皆有迴鶻監護使督以歲貢且爲漢誅至是遣裨將石公

緒等諭意兩部凡戮八百餘人又迴鶻初遣宣門將軍等四十七人詭詞結歡潛伺邊隙仲武使密賂其下盡得陰謀且欲馳入五原驅掠雜虜遂逗遛其使緩彼師期人馬病死竟不遣之迴鶻烏介可汗旣敗不敢近邊乃依康居求活盡徙餘種寄託黑車子仲武由是威加北狄表請於薊北立紀聖功銘勅李德裕爲之文其銘曰大和之初赤氣宵興開成之末彤雲暮凝異鳥南來胡滅之徵北夷颺掃厥國土崩逼迫遷徙震我邊鄙長蛇去穴奔鯨失水上都薊門兵連千里曾不畏天猶爲驕子而我邊穀邀我王師假我一城建彼幡旗歸計強漢郅支嫚辭狼顧朔野伏莽見羸鴈門之北羗戎雜處澱澱羣羊茫茫大鹵縱其梟騎驚我牧圉暴若豺狼疾如風雨皇赫斯怒羽檄徵兵謀而泉默斷乃霆聲沉機變化動合神明沙漠之外虜無隱情漁陽突騎燕歌壯氣起起元戎耽耽虎視金鼓誓衆千旄蔽地爰命其弟屬之大事翩翩飛將董我三軍稟兄之制代帥之勤威略火烈胡馬星分戈迴白日劍薄浮雲



天街之北旄頭已落絕轡之野車尤未縛俾我元侯恢弘遠略終  
取單于係之徽索陰山寢鋒亭微改弓萬里貫比夷九譯而通疆夷  
既同天子之功儒臣篆美刊石垂鴻仲武歷官至司徒中書門下  
平章事大中年卒諡曰莊子直方以幽州節度副使襲父位動多  
不法慮爲將卒所圖三年冬託以遊獵奔赴闕庭尋授金吾將軍  
直方性率暴行豪奪之事以罪累貶郴州司馬十一年遷右驍衛  
將軍分司東都咸通中位至羽林統軍中和歲賊巢犯闕公卿恃  
其豪多隱藏于第直方納招亡命謀欲劫巢或有告者由是以  
兵圍而害之

張允伸字逢昌范陽人也會祖秀檀州刺史祖巖納降軍使父朝  
掖贈太尉允伸世仕幽州軍門累職至押衙兼馬步都知兵馬使  
大中四年戎帥周繼賔疾表允伸爲留後朝廷可其奏加右散騎常  
侍其年冬詔賜旌節遷檢校工部尚書咸通九年累加至光祿大夫  
檢校司徒兼太傅同中書門下平章事燕國公十年徐人作亂請

以弟允臯領兵伐叛懿宗不允進助軍米五十萬石鹽二萬石詔嘉之賜以錦綵玉帶金銀器等冬又加特進兼侍中十二年以風恙拜章請就醫藥詔許之以子簡會檢校工部尚書充節度副大使十三年允伸再上表進納所賜旌節朝命未至其年正月二十五日卒年八十八冊贈太尉諡曰忠烈允伸領鎮凡二十三年克勤克儉比歲豐登邊鄙無虞軍民用乂至今談者美之有子十四人簡真幽府左司馬先允伸卒簡壽右領軍衛大將軍餘或昇朝籍或爲刺史郡佐

張公素范陽人咸通中爲幽州軍校事張允伸累遷至平州刺史允伸卒子簡會權主留後事公素領本郡兵赴焉三軍素畏公素威望簡會知力不能制即時出奔遂立爲帥朝廷尋授節旌累加至中書門下平章事無幾李茂勳奪其位公素歸闕貶復州司戶叅軍

李可舉本迴鶻阿布思之族也張仲武破迴鶻可舉父茂勳與本

部侯王降焉茂勲善騎射性沉毅仲武器之常遣拓邊以功封郡王賜姓名咸通末納降軍使陳貢言者幽之宿將人所信服茂勲密謀劫而殺之聲云貢言舉兵張公素以兵逆擊不利公素走茂勲入城軍民方知其非貢言也既有其衆遂推而立之朝廷即降符節無幾以疾告老授右僕射致仕表可舉自節度副使幽州左司馬加右散騎常侍爲節度留後中和中累官至檢校太尉中和末以太原李克用兵勢方盛與定州王處存密相締結可舉慮其窺伺山東終爲己患遂遣使構雲中赫連鐸乘其背則與鎮州合謀舉兵兼言易定是燕趙之餘云得其地則正其疆理而分之時可舉遣將李全忠攻易州有次將劉仁恭者多權數攻之彌月不下乃穴地道以入其城旣下易州士卒稍驕王處存引輕軍三千以羊皮蒙之夜伏於城外仍別於間道以騎士伺之燕軍望見謂之羣羊爭趨焉處存乘其無部伍一擊大敗之尋復其城全忠遁歸懼可舉罪之收其餘衆反攻幽州可舉危急收集其族登樓自燔而死

李全忠范陽人廣明中爲棣州司馬有蘆生于室一尺三節心惡之謂別駕張建曰五呂室生蘆無乃怪歟建曰蘆茅類得澤而滋公家有才士之慶殆天意乎其生三節必傳節鉞者三人公勉樹功名無忘斯言全忠秩滿還鄉里事節度使李可舉爲牙將時可舉兵鋒方盛欲與鎮人分易定遣全忠將兵攻之爲定州軍大敗於易水全忠懼率其餘衆掩攻幽州可舉死三軍推全忠爲留後朝廷因以節鉞授之光啓元年春也全忠卒子匡威自襲父位稱留後匡威素稱豪爽屬遇亂離繕甲募剋有吞四海之志赫連鐸據雲中屢引匡威與河東爭雲代交兵積年景福初鎮州王鎔誘河東將李存孝克用怒加兵討之時鎔童幼求援於燕匡威親率軍應之二年春河東復出師并陘鎔再乞師匡威來援匡威弟匡壽妻張氏有國色師將發家人會別匡威酒酣留張氏報之匡壽私懷憤怒匡威軍至博野匡壽乃據城自爲節度匡威部下聞之亡歸者半匡威退無歸路將入覲京師時匡威留於深州遣判官李

抱貞奉章以聞。屬京師大亂之後。聞匡威來朝。市人震恐。咸曰。金頭王來。謀社稷。士庶有亡。鳳山谷者。匡威其實不行。欲圖鎮州。示無留意。鎔以匡威再來。援已致其失師。遣使迎歸府第。父事之。匡威爲鎔城郭。繕甲指陳方略。視鎔如子。每陰謀驟施。以悅人心。鎮之三軍。素忠於王氏。惡其所爲。會鎔過。匡威第慰忌辰。匡威編衣裹甲。伏兵劫鎔入牙城。鎔兵逆戰。燔東偏門。軍士呼譟登屋。矢下如雨。鎔僕墨君和亂中。扶鎔登屋。免難。而斬匡威。以徇。是歲。匡籌出師攻鎮。之樂壽武強。以報恥。匡威部曲劉仁恭歸於河東。乾寧元年冬。河東聽仁恭之謀。出師進討。二月。敗燕軍於居庸。匡籌挈其族遁去。將赴京師。至景城。爲滄州節度使盧彥威所殺。掠其輜車妓妾。匡籌妻張氏產於路。不能進。劉仁恭獲之。獻於李克用。後立爲夫人。嬖寵專房。李氏父子三葉十年而亡。

史臣曰。大都偶國亂之本也。故古先哲王建國公侯之封。不過千乘。所以強幹弱枝。防其悖慢。彼幽州者。列九圍之一。地方千里。而遙

其民剛強厥田沃壤遠則慕田光荆卿之義近則深祿山思明之風三百餘年自相崇樹雖朝廷有時命帥而土人多務逐君習苦忘非尾大不掉非一朝一夕之故也若李載義張仲武張允伸因利乘便獲領旌旗以仁守之恭順朝言亦足多也如朱克融楊志誠史元忠張公素李可舉李全忠以不仁得之靡更曩志或尋爲篡奪或僅傳子孫咸非令終蓋其宜也

贊曰碣石之野氣勁人豪二百餘載自相尊高載義仲武亦多忠勞餘因篡得不仁何逃

唐書列傳卷第一百三十

教授朱倬校正



唐書列傳卷第一百三十一

劉

昉

等修

史憲誠 子孝章

何進滔

韓允忠

樂彥禎

羅弘信 子威

史憲誠其先出於奚虜今爲靈武建康人祖道德開府儀同三司  
試太常卿上柱國懷澤郡王父周洛爲魏博軍校事田季安至征  
馬大使銀青光祿大夫檢校太子賓客兼御史中丞柱國北海郡  
王憲誠始以材勇隨父歷軍中右職兼監察御史元和中田弘正  
討李師道令憲誠以先鋒四千人濟河累下其城柵復以大軍齊  
進乘勢逐北魏之全師迫于鄆之城下師道窮蹙劉悟斬首投魏  
軍錄功超授憲誠兼中丞鎮州王承宗死弘正自魏移領鎮州居  
數月爲王庭湊所殺遂以兵叛朝廷以弘正子布爲魏博節度使  
領兵討伐俾復父寃時幽州朱克融援助廷湊布不能制因自引  
決軍情置然憲誠爲中軍都知兵馬使乘亂以河朔舊事動其人



心諸軍即擁而歸魏共立爲帥國家因而命之時克融廷湊並據兵爲亂憲誠喜得旌節雖外順朝旨而中與朱王爲輔車之勢長慶二年正月也尋遣司門郎中韋文恪宣慰時李介爲亂與憲誠書問交通憲誠表請與介節鉞仍於黎陽艤舟示欲渡河及見文恪舉止驕倨其言甚悖旋聞介爲帳下所殺乃從改過謂文恪曰憲誠蕃人猶狗也唯能識主雖被棒打終不忍離其狡譎如此朝廷每爲優容尋加左僕射敬宗即位進秩司空大和二年滄景節度使李全略卒其子同捷竊據軍城表邀符節舉兵伐之先是憲誠與全略婚媾及同捷叛復潛以糧餉爲助上屢發使申諭尋又就加平章事憲誠嘗遣驍將至關下恣爲張大宰相韋處厚以語折挫之憲誠不敢復與同捷爲應時憲誠示出師共討同捷及滄景平加司徒憲誠心不自安乃遣子孝章入覲又飛章願以所管奉命上嘉之乃加侍中移鎮河中憲誠素懷向背不能以忠誠感激其衆未及出城大和三年六月二十六日夜爲軍衆所害冊贈太尉

孝章幼聰晤好學元和中李愬為魏帥取大將子弟列于軍籍孝章倡言願効文職愬奇之令攝府參軍及憲誠領節鉞改士曹參軍兼監察御史賜緋孝章以父在鎮多違朝旨嘗雪涕極諫備陳逆順之理朝廷聞而嘉之乃授檢校太子左諭德兼侍御史充節度副使累遷至散騎常侍兼御史大夫賜紫領本道兵同平滄景加工部尚書尋請赴闕文宗慰勞甚厚憲誠亦因懇乞朝覲上知憲誠之入覲自孝章之謀遂加禮部尚書分相衛澶三州別為一鎮俾孝章領之孝章未到鎮憲誠遇害上以孝章有忠節起復為右金吾衛將軍開歲授鄜坊節度使居四年遷于滑一歲入為右領軍大將軍改右金吾大將軍俄授邠寧節度孝章歷三鎮雖無異績而謹身畏法以保初終開成三年十月卒贈右僕射

何進滔靈武人也曾祖孝物祖俊並本州軍校父默夏州衙前兵馬使檢校太子賓客試太常卿以進滔之貴贈左散騎常侍進滔客寄於魏委質軍門事節度使田弘正弘正奉詔討鄆州破李師

道時進酒爲衙內都知兵馬使以功授兼侍御史大和三年軍衆害史憲誠連聲而呼曰得衙內都知兵馬使何端公知留後即三軍安矣推而立之朝廷因授進酒左散騎常侍魏博等州節度觀察處置等使爲魏帥十餘年大得民情累官至司徒平章事卒子弘敬襲其位朝廷時遣河中帥李執方滄州帥劉約各遣使勸令歸闕別俟朝旨弘敬不從竟就加節制及劉稹反不時起兵鎮州王元逵下邢洛二州兵次上黨弘敬方出師墜境大中後宣宗務其姑息繼加官爵亦至使相咸通初卒子全暉嗣之朝廷尋降符節累官亦至同平章事十一年爲軍人所害子孫相繼四十餘年

韓允忠魏州人也舊名君雄懿宗改賜今名父國昌歷本州右職會昌中從何弘敬破劉稹以功爲貝州刺史兼御史中丞以允忠故累贈兵部尚書允忠少仕軍門繼升裨校潞州之役亦與其行咸通十一年何全暉爲軍衆所殺推允忠爲帥時僖宗爲普王即降詔遙領節度授允忠左散騎常侍兼御史中丞充節度觀察留

後不數月轉檢校工部尚書魏州大都督府長史充魏博節度觀察等使累加至檢校司空同平章事乾符元年十一月卒年六十一累贈太尉子簡自允忠初授戎帥便爲節度副使乾符初累官至檢校工部尚書允忠卒即起復爲節度觀察留後踰月加檢校右僕射其後累加至侍中封昌黎郡王賊巢之亂諸葛爽受其僞命河陽節度使時僖宗在蜀寇盜蜂起簡據有六州甲兵強盛竊懷僭亂之志且欲啓其封疆乃舉兵攻河陽爽弃城而走簡遂留兵保守因北掠邢洛而歸遂移軍攻鄆鄆帥曹全晟出戰爲簡所敗死之鄆將崔君裕收合殘衆保鄆州簡進攻其城半年不下河陽復爲諸葛爽所襲簡因欲先討君裕次及河陽乃舉兵至鄆君裕請降尋移軍復攻河陽行及新鄉爲爽軍逆擊敗之簡單騎奔迴憂憤疽發背而卒時中和元年十一月也

樂彥禎魏州人也父少寂歷瀘博貝三州刺史贈工部尚書彥禎少爲本州軍校韓簡之領節旄也以彥禎爲馬步軍都虞候轉

博州刺史下河陽走諸葛爽有功遷澶州刺史簡再討河陽之敗也彥禎以一軍先歸魏人遂共立之朝廷尋授檢校工部尚書知魏博留後俄加戶部尚書充節度觀察處置等使中和四年累加至尚書左僕射同平章事僖宗自蜀迴加開府儀同三司冊拜司徒彥禎志滿驕大動多不法一旦徵六州之衆板築羅城約河門舊堤周八十里月餘而畢人用怨咨又其子從訓天資悖逆王鐸自滑移鎮滄州過魏郊從訓見其女妓利之先伏兵於漳南高雞泊俟鐸之至圍而害之掠其所有時朝廷微弱不能詰魏人素知鐸名望議者惜之而罪從訓從訓又召亡命之徒五百餘輩出入卧內號爲子將委以腹心軍人籍籍各有異議從訓聞而忌之易服遁出止於近縣彥禎因命爲六州都指揮使未幾又兼相州刺史到任之後般輦軍器取索錢帛使人來往交午塗路軍府疑貳彥禎危憤而卒衆推都將趙文珩知留後事從訓自相州領兵三萬餘人至城下文珩按兵不出衆懷疑懼復害文珩推羅弘信爲

帥弘信以兵出戰敗之從訓招集餘衆次於汧水弘信遣將程公佐領兵討擊大敗之梟從訓首於軍門時文德元年春也

羅弘信字德孚魏州貴鄉人曾祖秀祖珍父讓皆爲本州軍校弘信少從戎役歷事節度使韓簡樂彥禎光啓末彥禎子從訓忌牙軍出居於外軍衆廢彥禎推趙文珣權主軍州事衆復以爲不便因推弘信爲帥先是有鄰人密謂弘信曰某嘗夜遇一白鬚翁相告云君當爲土地主如是者再三弘信竊異之及廢文珣軍人聚呼曰孰願爲節度使者弘信即應之曰白鬚翁早以命我衆乃環而視之曰可也由是立之僖宗聞之文德元年四月詔加工部尚書權知節度留後七月復加金紫光祿大夫檢校尚書右僕射充魏博節度觀察處置等使龍紀中加檢校司空同平章事封豫章郡公乾寧中朱全忠急攻鄆朱瑄求援於太原太原發軍假道於魏令大將李存信屯華縣存信御軍無法侵魏之屬牧弘信不平之全忠復遣人謂之曰太原志吞河朔迴戈之日貴道堪憂弘信乃

託好於汴出師三萬攻存信敗之太原怒舉兵攻魏營於觀音門外汴將葛從周援之屯於洹水李克用子落落時爲鐵林軍使爲從周所擒乃退歸自是太原之師每歲侵擾相魏魏人患之朱全忠方事充軫懼弘信離貳每歲時賂遺必卑辭厚禮荅貺全忠對魏使北面拜而受之曰六兄比子倍年已上兄弟之國安得以常鄰遇之弘信以爲厚已亦推心焉弘信累官至檢校太師守侍中臨清王光化元年九月卒年六十三贈太師追封北平王謚曰莊肅子威威字端己文德初授左散騎常侍充天雄軍節度副使自龍紀至乾寧十年之中累加官爵弘信卒襲父位爲留後朝廷從而命之天復末累加至檢校太傅兼侍中長沙王天祐初授檢校太尉守侍中進封鄴王賜號忠勤宣力致理功臣魏之牙中軍者自至德中田承嗣盜據相魏擅博衛貝等六州召募軍中子弟置之部下遂以爲號皆豐給厚賜不勝驕寵年代浸遠父子相襲親黨膠固其兇戾者強買豪奪踰法犯令長吏不能禁變易主帥有同兒戲

如史憲誠何進滔韓君雄樂彥禎皆爲其所立優獎小不如意則舉族被害威懲其在弊雖以貨賂姑息而心銜之威嗣世之明年正月幽州劉仁恭擁兵十萬謀亂河朔進陷貝州長驅攻魏威求援於汴朱全忠遣將李思安屯於汧水葛從周自邢洛引軍入魏燕將劉守文單可及攻汴軍於內黃思安逆戰大敗之乘勝追躡從周出會掩擊復敗燕軍斬首三萬三年威引汴軍攻滄州以報之自是威感全忠援助之恩合從景附天祐二年七月十三日夜牙軍裨校李公佐作亂威僅以身免公佐出奔滄州自是愈懼遣使求援於全忠密謀破之全忠遣李思安會魏博軍再攻滄州全忠女妻威子廷規先是卒全忠遣長直軍校馬嗣勲選兵千人密於輿中實兵甲入魏言助女葬事三年正月五日嗣勲至全忠親率大軍濟河言視行營於滄景威欲因而出迎至期即假全忠帳下銳卒入而夾攻之牙軍頗疑堅請不出威恐洩其事慰納之是月十四日夜率廝養百十輩與嗣勲合攻之時宿於牙城者千人遲明



殺之殆盡凡八千家皆破其族魏軍攻滄州者在歷亭聞有變其  
將史仁遇擁之保于高堂六州之內皆爲讎敵累月平之威仕梁  
數年後卒年二十四位至守太師兼中書令贈尚書令謚曰貞壯  
威性明敏達於吏道伏膺儒術招納文人聚書至萬卷每花朝月  
夕與賓佐賦詠甚有情致錢塘人羅隱者有當世詩名自號江東  
生威遣使賂遺敘其宗姓推爲叔父隱亦集其詩寄之威酷嗜其  
作目已所爲曰偷江東集凡五卷今鄴中人士諷詠之

史臣曰魏鎮燕三鎮不能制之也久矣兵強地廣合從連衡爵命  
雖假於朝廷羣臣自謀於元帥如史憲誠等五家其初皆因此而  
得之其後亦因此而失之蓋不知取之以權守之以仁則遠矣若善  
繼者史氏羅氏之二子有焉其餘不足觀也

贊曰逆取順守古亦有之如其逆守滅亡必隨史何韓樂世數盛  
衰足以爲鑒念茲在茲

唐書列傳卷第一百二十一 左奉議郎元紹興府府學教授朱倬校正

唐書列傳卷第一百三十二

劉

昉

等修

王重榮

王處存弟處直

諸葛爽

高駢

畢師鐸秦彥

時溥

朱瑄弟瑄

王重榮河中人父縱鹽州刺史咸通中有邊功重榮以父蔭補軍校與兄重盈俱號驍雄名龍軍中廣明初重榮為河中馬步軍都虞候巢賊據長安蒲帥李都不能拒稱臣於賊賊偽授重榮節度副使河中密邇京師賊徵求無已軍府疲於供億賊使百輩填委傳舍重榮謂都曰吾以外援未至詭謀附賊以紓難今軍府積實苦被徵求復來收兵是賊危我也儻不改圖危亡必矣請絕橋道嬰城自固都曰吾兵微力寡絕之立見其患唯公圖之願以節鉞假公翌日都歸行在重榮知留後事乃斬賊使求援鄰藩既而賊將朱溫舟師自同州至黃鄴之兵自華陰至數萬攻之重榮戒勵士衆大敗之獲其兵仗軍聲益振朝廷遂授節鉞檢校司空時中

和元年夏也俄而忠武監軍楊復光率陳蔡之師萬人與重榮合  
賊將李祥守華州重榮合勢攻之擒祥以徇俄而朱溫以同州降  
賊既失同華狂躁益熾黃巢自率精兵數萬至梁田坡時重榮軍  
華陰南楊復光在渭北犄角破賊出其不意大敗賊軍獲其將趙  
璋巢中涓矢而退而重榮之師亡耗殆半懼賊復來深憂之謂復  
光曰軍雖小捷銳旅亡失萬一賊儻復來其將何軍以應吾之成  
敗未可知也復光曰鴈門李僕射與僕家世事舊其尊人與僕父  
兄同患難僕射奮不顧身死義知己儻得李鴈門爲援吾事濟矣  
因遣使傳詔徵兵明年李克用領軍至大敗巢賊收復京城其倡  
義啓道之功實重榮居首京師平以功檢校太尉同平章事瑯琊  
郡王光啓元年僖宗還京喪亂之後六軍初復國藏虛竭觀軍容  
使田令孜奏以安邑解縣兩池推課直屬省司以充贍給舊事河  
中節度兼權使每年額輸省課重榮累表論列既循往例兼恃大  
功令孜不許奏請移重榮爲定州節度制下不奉詔令孜率禁軍

攻之屯于沙苑爲重榮擊敗之十二月令孜挾天子出幸寶雞太  
原聞之乃與重榮入援京師遣使迎駕還宮令孜尤懼却劫幸山  
南及朱玫立襄王稱制重榮不受命會太原之師於河西以圖興  
復明年王行瑜殺朱玫僖宗反正重榮之忠力居多重榮用法稍  
嚴季年尤甚部下常行儒者嘗有所譴罰深銜之光啓三年六月  
行儒以兵攻府第重榮夜出於城外別墅詰旦爲行儒所害行儒  
乃推重盈爲帥重盈旣立誅行儒與其黨安集軍民乾寧初重盈  
卒軍府推行軍司馬王珂爲留後重盈子珙時爲陝帥瑤爲絳州  
刺史珂即重榮兄重簡子出繼重榮繇是爭爲蒲帥瑤珙上章論  
列又與朱溫書云珂非吾兄弟子家之蒼頭也小字蟲兒安得繼  
嗣珂上章云亡父有興復之功遣使求援於太原太原保薦於朝  
珙厚結王行瑜李茂貞韓建爲援三鎮互相表薦昭宗詔諭之曰  
吾以太原與重榮有再造之功已前其奏矣故明年五月茂貞等  
三人率兵入觀賊害時政請以河中授珙珙瑤連兵攻河中李克用

怒出師討三鎮瑤瑒兵退克用拔絳州斬瑤乃師於渭北天子以珂  
爲河中節度授以旄鉞仍充供軍糧料使旣誅王行瑜克用以女  
妻之珂親至太原太原令李嗣昭將兵助珂攻瑒瑒每戰頻敗瑒  
性慘刻人有踰犯必斬首置於座前言笑自若部下咸苦之因其  
削弱皆懷離叛光化二年六月部將李璿殺瑒自稱留後光化末  
朱溫初伏鎮定將圖關輔屬劉季述廢立之際京師倣擾崔胤潛  
乞師於汴以圖反正溫謂其將張存歆侯言曰王珂恃太原之勢  
侮慢藩鄰骨肉相殘自大其事爾爲我持一繩以縛之存歆等率  
兵數萬渡河由含山出其不意天復元年正月兵攻晉絳珂將絳  
州刺史陶建釗晉州刺史張漢瑜旣無備卽開門降溫令別將何  
綱守晉州扼其援路二月存歆大軍逼河中珂遣告急於太原晉  
絳旣當兵衝援師不能進珂妻書告太原曰賊勢攻逼朝夕爲俘  
囚乞食大梁大人安忍不救克用曰賊阻前途衆寡不敵救則與  
爾兩亡可與王郎歸朝廷珂計無從出卽謀歸京師又使人告李

茂貞曰聖上初返正詔藩鎮無相侵伐同匡王室朱公不顧國家  
約束卒遣賊臣急攻弊邑則朱公之心可見矣弊邑若亡則同華  
邠歧非諸君所能保也天子神器拱手而授人矣此自然之勢也  
公可與華州令公早出精銳固潼關以應弊邑僕自量不武請於  
公之西偏求為鎮守此地請公有之關西安危國祚延促繫公此  
舉也茂貞不荅珂勢蹙將渡河歸京師人情離合時何橋毀圯凌  
漸鯁塞舟楫難濟珂族艤舟有曰珂夜自慰諭守陴者默然無應  
牙將劉訓夜半至珂寢門珂吐之曰兵欲反耶訓解衣袒索曰公苟  
懷疑訓請斷臂珂曰事勢如何計將安出訓曰若夜出整棹待濟  
人必爭舟苟一夫鴟張其禍莫測不如俟明旦以情諭三軍願從者  
必半然後登舟赴關可以前濟不然則召諸將校且為款狀以緩  
賊軍徐圖向背策之上也珂然之即登城謂存敬曰吾於汴王有  
家世事分公宜退舍俟汴王至吾自聽命存敬即日退舍三月朱  
溫自洛陽至先哭於重榮之墓悲不自勝陳辭致祭蒲人聞之感

悅珂欲面縛牽羊以見溫報曰太師阿舅之恩何時可忘耶郎君若以亡國之禮相見黃泉其謂我何及珂出迎之於路握手歔歔聯轡而入居半月以存敬守河中珂舉家徙于汴後溫令珂入覲遣人殺之於華州傳舍自重榮初帥河中珂三政二十年

王處存京兆萬年縣勝業里人世隸神策軍爲京師富族財產數百萬父宗自軍校累至檢校司空金吾大將軍左街使遙領興元節度宗善興利乘時貿易由是富擬王者仕官因貲而貴侯服玉食僮奴萬指處存起家右軍鎮使累至驍衛將軍左軍巡使乾符六年十月檢校刑部尚書義武軍節度使明年黃巢犯闕僖宗出幸處存號哭累日不俟詔命即率本軍入援遣二千人間道往山南衛從車駕時李都守河中降賊會王重榮斬僞使通使於處存乃同盟誓師營於渭北時巢賊僭號天下藩鎮多受其僞命唯鄭畋守鳳翔鄭從讜守太原處存王重榮首倡義舉以招太原俄而鄭畋破賊前鋒王鐸自行在至故諸鎮翻然改圖以出勤王之師

中和元年四月涇原行軍唐弘夫敗賊將林言尚讓軍乘勝進逼京師處存自渭北親選驍卒五千皆以白繻爲號夜入京城賊已遁去京師故人見處存遮道慟哭歡呼塞路軍人皆釋兵爭據第宅坊市少年多帶白號雜軍人翌日賊偵知自灞上復襲京師市人以爲王師歡呼迎之處存爲賊所迫收軍還營賊怒召集兩市丁壯七八萬併殺之血流成渠處存家在京師世受國恩以賊寇未平鑾輿出狩每言及時事未嘗不喑鳴流涕諸軍義之前後遣使十輩迎李克用旣弈世姻好特相款昵泊收京師王鐸第其功勤王舉義處存爲之最收城破賊克用爲之最以功檢校司空後又遣大將張公慶率勁兵三千合諸軍滅賊巢於泰山以功檢校司徒田令孜討王重榮詔處存爲河中節度處存上章申理言重榮無罪有大功於國不宜輕有除改以揺藩鎮之心初幽鎮兩藩兵甲強盛易定於其閒疲於侵寇及臣威得志驕盈恒欲兼并之賴與太原姻好每爲之援處存亦睦鄰以禮優撫軍民折節下士人多歸



之以至抗衡列鎮累加侍中檢校太尉乾寧二年九月卒年六十  
五贈太子太師諡曰忠肅三軍以河朔舊事推其子副大使部爲  
留後朝廷從而命之授以旄鉞尋加檢校司空同平章事累至太  
保光化三年七月汴將張存敬進寇幽州旋入祁溝部遣馬步都  
將王處直將兵拒之爲存敬所敗退營沙河汴人進擊營於懷德  
驛處直之衆奔撓城中大恐十月部委城攜族奔於太原太原累  
表授檢校太尉天復初卒於晉陽其弟鄴克用以女妻之歷嵐石  
河三州刺史大同軍防禦使天祐中卒

處直字允明處存母弟也初爲定州後院軍都知兵馬使汴人寇  
處直拒戰不利而退三軍大譟推處直爲帥及部出奔乃權留後  
事汴將張存敬攻城梯衝雲合處直登城呼曰弊邑於朝廷未嘗  
不忠於藩鄰未嘗失禮不虞君之涉吾地何也朱溫遣人報之曰  
何以附太原而弱鄰道處直報曰吾兄與太原同時立勲王室地  
又親鄰脩好往來常道也請從此改圖溫許之仍歸罪於孔目吏

梁問出綸十萬匹牛酒以犒汴軍存訖脩盟而退溫因表授旄鉞檢校左僕射天祐元年加太保封太原王後仕僞梁授北平王檢校太尉不數歲復於莊宗後十餘年爲其子都廢歸私第尋卒年六十一諸葛爽青州博昌人役屬縣爲伍伯爲令所笞乃弃役以里謳自給會龐勛之亂乃委身爲徐卒累軍功至小校官軍討徐龐勛勢蹙率百餘人與泗州守將陽羣歸國累授汝州防禦使李琢爲招討使討沙陞於雲州表爽爲副廣明元年賊陷京師詔爽率代北行營兵馬赴難關中爽軍屯櫟陽潼關不守車駕出幸爽乃降賊巢以爽爲河陽節度使巢賊敗復表歸國進位檢校司徒時魏博韓簡軍勢方盛中和元年四月魏人攻河陽大敗爽軍於修武爽弃城遁走簡令大將守河陽乃出師討曹全最於鄆州十月孟州人復誘爽爽自金商率兵千人復入河陽乃犒勞魏人今趙文珩率之而去十一月爽攻新鄉簡自鄆來逆戰軍於獲嘉西北時簡將引魏人入趨關輔誅除巢孽自有圖王之志三軍屢諫不從偏將樂

彥禎因衆心搖說激之牙軍奔歸魏州爽軍乘之簡鄉兵八萬大敗奔騰亂死清水爲之不沫明年正月簡爲牙軍所殺爽軍由是大振及巢賊將敗爽復歸國爽雖起群盜旣貴之後善於爲理所至法令澄清人無怨歎人士以此多之光啓二年爽卒帳中將劉經張言以爽子仲方爲孟帥俄而蔡賊孫儒率衆攻之城陷於賊仲方歸於汴儒遂據孟州

高駢字千里幽州人祖崇文元和初功臣封南平王自有傳父承明神策虞候駢家世仕禁軍幼而朗拔好爲文多與儒者遊喜言理道兩軍中貴翕然稱重乃縻之勇爵累歷神策都虞候會党項羗叛令率禁兵萬人戍長武城時諸將禦羗無功唯駢伺隙用兵出無不捷懿宗深嘉之西蕃寇邊移鎮秦州尋授秦州刺史本州經略使先是李琢爲安南都護貪於貨賄虐賦夷獠人多怨叛遂結蠻軍合勢攻安南陷之自是累年亟命將帥未能收復五年移駢爲安南都護至則匡合五管之兵暮年之內招懷溪洞誅其首惡

一戰而壘卒遁去收復交州郡邑又以廣州饋運艱隘駢視其水路自交至廣多有巨石梗途乃購募工徒作法去之由是舟楫無滯安南儲備不乏至今賴之天子嘉其才遷檢校工部尚書鄆州刺史天平軍節度觀察等使治鄆之政民吏歌之南詔蠻寇雋州渡瀘肆掠乃以駢爲成都尹劍南西川節度觀察等使蜀土散惡成都比無垣墉駢乃計每歲完葺之費斂之以博甓雉堞由是宇堅傳檄雲南以兵壓境講信脩好不敢入寇進位檢校尚書右僕射江陵尹荆南節度觀察等使乾符四年進位檢校司空潤州刺史鎮海軍節度浙江西道觀察等使進封燕國公時草賊王仙芝陷荆襄宋威率諸道師討逐其衆離散過江表天子以駢前鎮鄆軍民畏服仙芝徒黨鄆人也故授駢京口節鉞以招懷之尋授諸道兵馬都統江淮鹽鐵轉運等使駢令其將張璘梁續分兵討賊前後累捷降其首領數十人賊南趨嶺表天子嘉之六年冬進位檢校司徒揚州大都督府長史淮南節度副大使知節度事兵馬

都統鹽鐵轉運使如故駢至淮南繕完城壘招募軍旅土客之軍  
七萬乃傳檄徭天下兵威望大振朝廷深倚賴之進位檢校太尉  
同平章事既而黃巢賊合仙芝殘黨復陷湖南浙西州郡衆號百  
萬巢據廣州求天平節鉞朝廷議欲以南海節鉞授之宰相盧攜  
與駢素善以駢前在浙西已立討賊之効今方集諸道之師於淮  
甸不宜捨賊以弱士心鄭畋議且宜假賊方鎮以紓難二人爭論  
於朝以言詞不遜由是兩罷之駢方持兵柄聞朝議異同心頗不  
平之廣明元年夏黃巢之黨自嶺表北趨江淮由採石渡江張璠  
勒兵天長欲擊之駢怨朝議有不附己者欲賊縱橫河洛今朝廷  
聳振則從而誅之大將畢師鐸曰妖賊百萬所經鎮戍若蹈無人  
之境今朝廷所恃者都統破賊要害之地唯江淮爲首彼衆我寡  
若不據津要以擊之俾北渡長淮何以扼束中原陷覆必矣駢駭  
然曰君言是也即令出軍有愛將呂用之者以左道媚駢駢頗用  
其言用之懼師鐸等立功即奪已權從容謂駢曰相公勲業高矣

妖賊未殄朝廷已有閒言賊若盪平則威望震主功居不賞公安  
稅駕耶爲公良畫莫若觀釁自求多福駢深然之乃止諸將但握  
兵保境而已其年冬賊陷河洛中使促駢討賊冠蓋相望駢終逗  
撓不行旣而兩京覆沒盧攜死駢大閱軍師欲兼并兩浙爲孫策  
三分之計天子在蜀亟命出師中和二年五月雉雥於揚州廨舍占  
者云野鳥入室軍府將空駢心惡之其月盡出兵於東塘結壘而  
處每日教閱如赴難之勢仍與浙西周寶書請同入援京師寶大  
喜即點閱將赴之遣人偵之知其非實駢在東塘凡百日復還廣  
陵蓋獲雥雥之異也僖宗知駢無赴難意乃以宰臣王鐸爲京城  
四面諸道行營兵馬都統崔安潛副之韋昭度領江淮鹽鐵轉運  
使增駢階爵使務並停駢旣失兵柄又落利權攘袂大詬累上章  
論列語詞不遜其末章曰臣伏奉詔命令臣自省更勿依違者臣  
仰天訴地血淚交流如劒戟攢心若湯火在己只如黃巢大寇圍  
逼天長小城四旬有餘竟至敗走臣散留諸道兵甲盡出家財賞

給而諸道多不發兵財物即爲己有縱然遣使徵得勅旨不許過  
淮其時黃巢殘兇纔及二萬經過數千里軍鎮盡若無人只如潼  
關已東止有一徑其爲險固甚於井陘豈有狂寇奔衝略無阻礙  
即百二之地固是虛言神策六軍此時安在陛下蒼黃西去內官  
奔命東來黎庶盡被殺傷衣冠悉遭屠戮今則園陵開毀宗廟荆  
榛遠近痛傷遐邇嗟怨雖然姦臣未悟陛下猶迷不思宗廟之焚  
燒不痛園陵之開毀臣之痛也實在於斯此事見之多年不獨知  
於今日況自崔蒲盜起朝廷徵用至多上至帥臣下及裨將以臣  
所料悉可坐擒用此爲謀安能辦事陛下今用王鐸盡主兵權誠  
知狂寇必殲梟巢即覆臣讀禮至宜尼射於矍相之圃蓋觀者如  
堵牆使子路出延射曰潰軍之將亡國之大夫與爲人後者不入於  
射也嚴誠如斯圖功也豈宜容易陛下安忍委敗軍之將陷一儒  
臣崔安潛到處貪殘只如西川可爲驗矣委之副貳詎可平戎况  
天下兵驕在處僭越豈二儒士能戢彊兵萬一乖張將何救助願

陛下下念黎庶上爲宗祧無使百代有抱恨之臣千古留刮席之  
恥臣但慮寇生東土劉氏復興即軼道之災豈獨往日乞陛下稍  
留神慮以安宗社今賢才在野憊人滿朝致陛下爲亡國之君此  
等計將安出伏乞戮賣官鬻爵之輩徵鯁直公正之人委之重難  
置之左右剋復宮闕莫尚於斯若此時謗誹忠臣沉埋烈士匡復  
宗社未見有期臣受國恩深不覺語切無任憂懼之至詔報駢曰  
省表具悉卿一門忠孝三代勲庸銘於景鍾煥在青史卿承祖父  
之訓襲弓冶之基起自禁軍從微至著始則囊錐露穎稍有知音  
尋則天驥呈才急於試効自秦州經略使授交趾節旄聯翩寵榮汗  
漫富貴未嘗斷絕僅二十年卿報國之功亦可悉數最顯赫者安南  
拒蠻至今海隅尚守次則汶陽之日政聲洽平泊臨成都脅歸驃  
信三載之內亦無侵凌創築羅城大新錦里其爲雄壯實少比儔  
渚宮不暇於施爲便當移鎮建鄴纔聞於安靜旋即渡江自到廣  
陵併鍾多壘即亦招降草寇救援臨淮大約昭灼功勲不大於此



數者朝廷累加渥澤靡忝徽章位極三公兵環大鎮銅鹽重務綰握約及七年都統雄藩幅圓幾於萬里朕瞻如太華倚若長城凡有奏論無不依允其爲託賴豈愧神明自黃巢肆毒咸京卿並不離隋苑豈金陵苑水能遮鵝鸛之雄風伯雨師終阻帆檣之利自聞歸止寧免鬱陶卿旣安住蕪城鄭畋以春初入覲遂命上相親領師徒因落卿都統之名固亦不乖事例仍加封實貴表優恩何廼疑忿太深指陳過當移時省讀深用震嗟聊舉諸條粗申報復卿表云自是陛下不用微臣固非微臣有負陛下者朕拔卿汶上超領劔南荆潤維揚聯居四鎮綰利則牢盆在手主兵則都統當權直至京北京南神策諸鎮悉在指揮之下可知董制之雄而乃貴作司徒榮爲太尉以爲不用何名爲用乎卿又云若欲俯念舊勳停觀後効何不以王鐸權位與臣主持必能糾率諸侯誅鋤羣盜者朕緣以付卿兵柄不能剪滅元兇自天長漏網過淮不出一兵襲逐奄殘京國首尾三年廣陵之師未離封部忠臣積望勇士興譏所以

擢用元臣誅夷巨寇心期貔武便掃撓搶卿初委張璘請放却諸  
道兵士辛勤召置容易放還璘果敗亡巢益顛越卿前年初夏逞  
發神機與京中朝貴書題云得靈僊教導芒種之後賊必蕩平尋  
聞圍逼天長必謂死在卿手豈知魚跳鼎釜脫網羅遽過長淮  
音爲大慙都統旣不能禦遏諸將更何以枝梧果致連犯關河繼  
傾都邑從來倚仗之意一旦控告無門疑睇東南惟增悽惻及朕  
蒙塵入蜀宗廟汚於賊庭天下人心無不雲涕旣知曆數猶在謳謠  
未移則懷忠撓怒之臣貯救難除姦之志便須果決安可因循況  
恩厚者其報深位重者其心急此際天下義舉皆望淮海率先豈  
知近輔儒臣先爲首唱而窮邊勇將誓志平戎關東寂寥不見干  
羽伯乎初秋臨覽表方云仲夏發兵便詔軍前并移汶上喜聞兵勢  
渴見旌幢尋稱宣潤阻艱難從天討謝玄破符堅於淝水裴度平  
元濟於淮西未必儒臣不如武將卿又云若不斤逐邪佞親近忠  
良臣旣不能保家陛下豈能安國忽當今日棄若寒灰者未委誰

是忠良誰爲邪佞終日寵榮富貴何嘗不保其家無人扞禦寇戎  
所以不安其國豈有位兼將相使帶銅鹽自謂寒灰眞同浪語卿  
又云不痛園陵之開毀不念宗廟之焚燒臣實痛之實在茲也且  
龜玉毀於櫝中誰之過也鯨鯢漏網於網外抑有其由卿手握強兵身  
居大鎮不能遮圍擒戮致令脫漏猖狂雖則上轍系天時抑亦旁由  
人事朕自到西蜀不離一室之中屏棄笙歌杜絕遊獵蔬食適口  
布服被身焚香以望園陵雪涕以思宗廟省躬罪己不敢遑安茲  
臣未悟之言誰人肯認陛下猶迷之語朕不敢當卿又云自來所  
用將帥上至帥臣下及裨將以臣所料悉可坐擒用此爲謀安能  
集事者且十室之邑猶有忠信天下至大豈無英雄況守固城池  
悉嚴兵甲縱非盡美安得平欺卿尚不能縛黃巢於天長安能坐  
擒諸將只如拓拔思恭諸葛爽輩安能坐擒耶勿務大言不堪垂  
訓卿又云王鐸是敗軍之將兼微引矍相射義者昔曹沫三敗終  
復魯讎孟明再奔竟雪秦恥近代汾陽尚父咸寧太師亦曾不利

鼓鼙尋則功成鍾鼎安知王鐸不立大勲卿又云無使百代有抱  
恨之臣千古留刮席之恥但慮寇生東土劉氏復興即軼道之災  
豈獨往日者我國家景祚方遠天命未窮海內人心尚樂唐德朕  
不茆酒色不虧刑名不結怨於生靈不貪財於寓縣自知運曆必  
保延洪況巡省已來禎祥荐降西蜀半年之內聲明又以備全塞  
北日南悉來朝貢黠戛善闡並至梯航但慮天寶建中未如今日  
清宮復國必有近期卿云劉氏復興不知誰爲其首遽言刮席之  
恥比朕於劉盆子耶仍憂軼道之災方朕於秦子嬰也雖稱直行  
何太罔誣三復斯言尤深駭異卿又云賢才在野儉人滿朝致陛  
下爲亡國之君此子等計將安出伏乞戮賣官鬻爵之輩銜鯁直  
公正之臣者且唐虞之世未必盡是忠良今巖野之間安得不遺  
賢彥朕每今銓擇亦遣訪求其於選將料兵安人救物但屬收復  
之業講求理化之基自有長才同臣大計賣官鬻爵之士中外必  
不有之勿聽狂辭以資游說且朕遠遣官闕寄寓巴邛所失恩者

甚多尚不興怨卿落一都統何足介懷況天步未傾皇綱尚整三  
靈不昧百度猶存但守君臣之軌儀正上下之名分宜遵教約未  
可隳凌朕雖冲人安得輕侮但以知卿歲久許卿分深責存終始  
之恩勿貽猜嫌之慮所宜深省無更過言駢始以兵權欲臨藩鎮  
吞併江南一朝失之威望頓減陰謀自阻故累表堅論欲其復故  
明年四月王鐸與諸道之師敗賊關中收復京城駢聞之悔恨萬  
狀而部下多叛計無所出乃託求神仙屏絕戎政軍中可否取決  
於呂用之光啓初僖宗再幸山南李煜僭號偽授駢中書令諸道  
兵馬都統江淮鹽鐵轉運等使駢方怨望而甘於僞署稱藩納賄  
不絕於途宴宴自得日以神仙爲事呂用之又薦暨工諸葛殷張  
守一有長年之術駢並署爲牙將於府第別建道院院有迎仙樓  
延和閣高八十尺飾以珠璣金鈿侍女數百皆羽衣霓服和聲度  
曲擬之鈞天日與用之守一三人授道家法錄談論於其間賓佐罕  
見其面府第有隋煬帝所造門屋數間俗號中書門最爲宏壯

光啓元年無故自壞明年淮南饑蝗自西來行而不飛浮水緣城而入府第道院竹木一夕如翦經像幢節皆齧去其首撲之不能止旬日之內蝗自食噉而盡其年九月雨魚是月十日夜大星隕于延和閣前其聲如雷火光爍地自二年十一月雨雪陰晦至三年二月不解比歲不稔食物踊貴道殣相望饑骸蔽地是月浙西周寶爲三軍所逐駢喜以爲妖異當之三月蔡賊過淮口駢令畢師鐸出軍禦之師鐸與高郵鎮將張神劒鄭漢漳等率行營兵反攻揚州四月城陷師鐸囚駢於道院召宣州觀察使秦彥爲廣陵帥旣而蔡賊楊行密自壽州率兵三萬乘虛攻城城中米斗五十千餓死大半駢家屬並在道院秦彥供給甚薄薪蒸亦闕奴僕徹延和閣欄檻煮革帶食之互相篡啖駢召從事盧沅謂之曰子三朝爲國粗立功名比擺脫塵埃自求清淨非與人世爭利一旦至此神道其何望耶掩涕不能已初師鐸之入城也愛將申及謂駢曰逆黨人數不多即目施於防禁願奉令公潛出廣陵依投支郡以圖雪恥

賊不足平也若持疑不決及旦夕不得在公左右駢怯懼不能行其謀九月師鐸出城戰敗慮駢爲賊內應又有尼奉仙自言通神謂師鐸曰揚府災當有大人死應之自此善也秦彥曰大人非高令公耶即令師鐸以兵攻道院侍者白駢曰有賊攻門曰此秦彥來整衣候之俄而亂卒升階曳駢數之曰公上負天子恩下陷揚州民淮南塗炭公之罪也駢未暇言首已墮地矣駢旣死左右奴客踰垣而遁入行密軍行密聞之舉軍縞素繞城大哭者竟日仍焚紙奠酒信宿不已駢與兒姪死於道院都一坎瘞之裹之以氈行密入城以駢孫俞爲判官令主喪事葬送未行而俞卒後故吏曠師虔收葬之初師鐸入城呂用之張守一出奔楊行密詐言所居有金行密入城掘其家地下得銅人長三尺餘身被桎梏釘其心刻高駢二字於臂蓋以魅道厭勝蠱惑其心以至族滅

畢師鐸者曹州冤胸人乾符初與里人王仙芝嘯聚爲盜相與陷曹鄆荆襄師鐸善騎射其徒目爲鷄子仙芝死來降高駢初敗黃

巢於浙西皆師鐸梁續之効也頗寵待之駢末年惑於呂用之舊將俞公楚姚歸禮皆爲用之讒構見殺師鐸意不自安有愛妾復爲用之所奪光啓三年三月蔡賊楊行密逼淮口駢令師鐸率三百騎戍高郵戍將張神劒亦怒用之兩人謀自安之計用之伺知亟請召還師鐸母在廣陵遣信令師鐸遁去或謂師鐸曰請殺神劒併高郵之兵趨府令公必殺用之爲解又曰不如投徐州則身存而家保師鐸曰非計也呂用之誑惑主帥塗炭生民七八年來鬼怨人怒今日之事安知天不假手誅妖亂而康淮南耶又曰鄭漢璋是我歸順時副使常切齒於用之今率精兵在淮口聞吾此舉即樂從也乃趨淮口與漢璋合得兵千人又相與至高郵問計於張神劒神劒曰公見事晚耶用之一妖物耳前受襄王僞命作鎮廣州遲留不行志圖淮海節鎮令公已奪其魄彼一旦成事焉能北面事妖物耶即割臂血爲盟推師鐸爲盟主稱大丞相移檄郡縣以誅用之守一爲名乃署其卒長唐宏王朗格玄真倪詳錄本



趙簡等分董其卒三千人四月趨廣陵營於大明寺揚州大駭呂  
用之分兵城守高駢登延和閣聞鼓譟聲怪之用之曰師鐸兵士  
迴戈止遏不得適已隨宜處置公幸勿憂苟不聽徒勞立女一符  
耳師鐸陳兵數日用之屢出戰師鐸憂其不克求救于宣州秦  
彥曰苟得廣陵則迎公爲帥彥令牙將秦稠率兵三千助之師鐸  
門客畢慕顏自城中出曰人心已離破之必矣秦稠軍至兵威漸振  
駢聞甚憂謂用之曰吾以心腹仗爾不能駕馭此輩悞我何多百  
姓遭罹飢饉不可虐用吾自枉手札喻師鐸可令大將一人自行  
用之即以其黨許戡送駢書師鐸怒曰梁纘韓問何在令爾來耶  
即斬之用之選勁兵自衛一日至道院駢叱去之乃令猶子傑握牙  
兵令師鐸母作書遣大將古鐸與師鐸子出城喻之師鐸令子還  
白曰不敢負令公恩德正爲淮南除弊但斬用之守一即日退還  
高郵秦稠攻西南隅城中應之即日城陷呂用之由衆佐門遁走  
駢聞師鐸至改服俟之與師鐸交拜如賓主之儀即日署爲節度

副使漢璋神劔皆署職事秦稠點閱府庫監守之仍密召彥於宣州或謂師鐸曰公昨舉兵誅二妖物故人情樂從今軍府已安以事理論之公宜還政高公自典兵馬戎權在手取捨自由藩鄰聞之不失大義議者皆言秦稠破城之日已召秦彥彥若爲帥兵權非足下有也公感其援但以金玉報之阻其渡江最爲上策若秦彥作帥則楊行密朝間夕至如高令復帥外寇必自卷懷師鐸猶豫未決而秦彥軍至五月彥爲節度使署師鐸爲行軍司馬移居牙外心頗不悅是月楊行密引軍攻揚州彥兵拒戰繼敗八月師鐸與鄭漢璋出軍萬人擊行密皆大敗而還自是不復出九月師鐸殺高駢十月秦彥師鐸突圍而遁十一月秦彥師鐸引蔡賊孫儒之兵三萬圍揚州行密求救于汴朱全忠遣大將李璠率師淮口以爲聲援孫儒以廣陵未下而汴卒來又慮秦彥師鐸異志四年正月孫儒斬秦彥師鐸于高郵之南鄭漢璋亦死焉

秦彥者徐州人本名立爲卒隸徐軍乾符中坐盜繫獄將死夢人

謂之曰爾可隨我及寤械破乃得逸去因改名彥乃聚徒百人殺下邳令取其資裝入黃巢軍巢兵敗於淮南乃與許勅俱降高駢累奏授和州刺史中和二年宣歙觀察使竇滂病彥以兵襲取之遂代滂為觀察使朝廷因而命之光啓三年揚州牙將畢師鐸囚其帥高駢懼外寇來侵乃迎彥為帥彥召池州刺史趙鏐知宣州事自率衆入揚州師鐸推彥為帥五月壽州刺史楊行密率兵攻彥遣其將張神劒令統兵屯灣頭山光寺行密屯大雲寺北跨長崗前臨大道自揚子江北至槐家橋柵壘相聯秦彥登城望之懼形於色令秦稠師鐸率勁卒八千出關為行密所掩盡沒稠死之彥急求援於蘇州刺史張雄雄率兵赴之屯于東塘重圍半年城中菰糧並盡草根木實市肆藥物皮囊革帶食之亦盡外軍掠人而賣人五十千死者十六七縱存者鬼形鳥面氣息奄然張雄多軍糧相約交市城中以寶貝市米金一斤通犀帶一得米五升雄軍得貨不戰而去九月畢師鐸出戰又敗自是日與秦君相對嗟惋問神尼奉仙何以獲

濟尼曰走爲上計也十月彥與師繆于突圍投孫儒並爲所殺江淮之間廣陵大鎮富甲天下自師鐸秦彥之後孫儒行密繼踵相攻四五年閒連兵不息虛害焚蕩民戶喪亡廣陵之雄富掃地矣

時溥彭城人徐之牙將黃巢據長安詔徵天下兵進討中和二年武寧軍節度使支詳遣溥與副將陳璠率師五千赴難行至河陰軍亂剽河陰縣迴溥招合撫諭其衆復集懼罪屯于境上詳遣人迎犒悉恕之溥乃移軍向徐州旣入軍人大呼推溥爲留後送詳於大彭館溥大出資裝遣陳璠援詳歸京詳宿七里亭其夜爲璠所殺舉家屠害溥以璠爲宿州刺史晉以違命殺詳溥誅璠又令別將帥軍三千赴難京師天子還宮授之節鉞及黃巢攻陳州秦宗權據蔡州與賊連結徐蔡相近溥出師討之軍鋒益盛每戰屢捷黃巢之敗也其將尚讓以數千人降溥後林言又斬黃巢首歸徐州時溥功居第一詔授檢校太尉中書令鉅鹿郡王宗權未平仍授溥徐州行營兵馬都統蔡賊平朱全忠與之爭功遂相嫌怨淮南亂朝廷以全忠

遙領淮南節度以平孫儒行密之亂汴人應援路出徐方溥阻之全忠怒出師攻徐自光啓至大順六年間汴軍四集徐泗三郡民無耕稼頻歲水災人喪十六七溥窘蹙求和于汴全忠曰移鎮則可然之朝廷以尚書劉崇望代溥以溥爲太子太師溥懼出城見害不受代汴將龐師古陳兵于野溥求援于兗州朱瑾出兵救之值大雪糧盡而還城中守陴者飢甚加之病疫汴將王重師牛存節夜乘梯而入溥與妻子登樓自焚而卒景福二年四月也地入于汴

朱瑄宋州人父慶盜鹽抵法瑄逃於青州爲王郜武牙卒中和初黃巢據長安詔徵天下兵郜武遣牙將曹全晟率兵三千赴難關西瑄已爲軍候會青州盛言急郜武召全晟還路由鄆州時鄆帥薛崇爲草賊王仙芝所殺鄆將崔君裕權知州事全晟知其兵寡襲殺君裕據有鄆州自稱留後以瑄有功署爲濮州刺史留將牙軍光啓初魏博韓簡欲兼并曹鄆以兵濟河收鄆全晟出兵逆戰爲魏軍所敗全晟死之瑄收合殘卒保州城韓簡攻圍半年不能拔

會魏軍亂退去朝廷嘉之授以節鉞時瑄有衆三萬其弟瑾勇冠三軍有爭天下之心秦宗權之盛也屢侵鄭汴朱全忠爲賊所攻甚窘求救於瑄瑄令朱瑾出師援之擊敗秦宗權全忠乃與瑄情極隆厚全忠狡譎翻覆虎視藩鄰會宗權誅乃急攻徐州時溥求援于瑄瑄與全忠書請釋溥脩好僞許之瑄以恩及全忠遣使讓之又令朱瑾出軍援溥及徐泗平全忠乃移兵攻鄆三四年間每春秋入其境剽掠人不得耕織民爲俘者十五六瑄僉備殫竭景福末與弟瑾合兩鎮之兵與汴人大戰于魚山下瑄瑾俱敗兵士陷沒汴將朱友裕以長蘆圍之乾寧四年正月城中食竭瑄與妻榮氏出奔至中都爲野人所害傳首汴州榮氏至汴州爲尼

朱瑾瑄之母弟驍果善戰初乾符末朝廷以將軍齊克讓爲兗州節度瑾將襲取之乃求婚於克讓及親迎瑾選勇士衛從禮會之夜竊發逐克讓遂據城稱留後朝廷不獲已以節鉞授之及朱瑄平汴人移兵攻兗經年食盡瑾出城求食比還爲別將所拒不得

入乃渡淮依楊行密行密寵待之用爲壽州刺史大敗汴軍于清口自此全忠不敢以兵渡淮瑾楊溥時謀亂爲徐知訓所殺

史臣曰疾風知勁草世亂見忠臣誠哉是言也土運中微賊巢僭越藩伯勤王赴難者率有聲而無實唯重榮斬賊使於近關處存舉義師於安喜橫身泣赴不顧禍患遂得義徒雲合逆黨勢窮宜乎服冕乘軒傳家胙土而重榮傷於峻法嚴而少恩禍發興臺誠悲枉橫高駢起家禁旅頗立功名玩寇崇妖致茲狼籍後來勲德可誠前車瑄溥不以善取固宜凶終瑾持此狼心安逃虎口王綱之素羣盜及茲復何言哉

贊曰王者撫運居安慮危不以德處卽爲盜亂乾坤盪覆生聚流離讀駢章跡可爲涕洟

唐書列傳卷第二百三十二

左奉議郎元紹興府府學教授朱倬校正

唐書列傳卷第二百三十三

劉 响

外戚

獨孤懷恩

竇德明

姪懷貞族弟孝謙孝讓子希城希榮希範希範子錡希範從父弟維德

長孫敞

武承嗣

子延秀從父弟三思三思子崇訓從父弟承嗣

薛懷義

韋溫

王仁皎

子守一

吳淑

弟縉

竇觀

柳晟附

王思敬

子難得難得子子顏

自古后族能以德禮進退全宗保名者鮮矣蓋恃宮掖之寵接宴私之歡高爵厚祿驕其內聲色服翫惑於外莫知師友之訓不達危亡之道故以中才處之罕不覆敗亦由重植之木自然顛拔也明哲之君知驕侈之易滿榮寵之難保授任各當其才祿位不過其量告之以天命不易誠之以大義滅親使居無過之地永享不貲之福與國終始不失其所以親也易曰震來虩虩恐致福也又曰父子嘻嘻失家節也與其愛而失節曷若懼而致福魏氏懿漢





人之敗著矯枉之法幼主嗣位母后不得臨朝外氏無功時主不得封爵雖曰刻薄而下甄之族竟無大過皇唐受命長孫竇氏以勲賢任職而武氏韋氏以盈滿致覆夫廢興者豈天命哉蓋人事也竇威長孫無忌各自有傳其餘載其得失爲外戚傳以存鑒誡焉獨孤懷恩元貞皇后弟之子也父整隋涿郡太守懷恩幼時以獻皇后之姪養於宮中後仕爲鄆縣令高祖平京城授長安令在職嚴明甚得時譽及高祖受禪擢拜工部尚書時虞州刺史韋義節擊堯君素於蒲州而義節文吏怯懦頻戰不利高祖遣懷恩代揔其衆懷恩督兵城下爲賊所拒頻戰不利高祖切譴之因是怨望高祖嘗戲之曰弟姑子悉爲天子次當舅子乎懷恩遂自以爲符命每扼腕曰我家豈女獨富貴耶由是陰圖異計時虞鄉南山多羣盜劉武周將宋金剛寇陷涇州高祖悉發關中卒以隸太宗屯於栢壁懷恩遂與解縣令榮靜前五原縣主簿元君寶謀引王行本兵及武周連和與山賊劫永豐倉而斷栢壁糧道割河東地

以啗武周事臨發會夏縣人呂崇茂殺縣令據縣起兵應武周高祖遣懷恩與永安王孝基陝州總管于筠內史侍郎唐儉攻崇茂宋金剛潛兵來襲諸將盡沒君寶與開府劉讓亦同陷于賊中遂洩懷恩之謀既而懷恩逃歸高祖復令率師攻蒲州唐儉在賊中說賊將尉遲敬德請使讓還連和罷兵遂使發其事會堯君素爲其下所殺小帥王行本以蒲州降懷恩勒兵入據其城高祖將濟河已御舟矣會讓至迺使召懷恩懷恩不知事已洩輕舟來赴及中流而執之收其黨按驗遂誅之時年三十六籍沒其家

竇德明太穆順聖皇后兄之孫也祖照尚後魏文帝女義陽公主封鉅鹿公父彥襲父封仕隋爲西平郡守德明少師事陳留王孝逸頗涉文史會漢王諒作亂遣其將綦良攻黎州德明時年十八募得五千人倍道而進號令嚴整一戰破之以功累拜齊王府屬坐事免及義師圍長安永安王孝基襄邑王神符江夏王道宗及高祖之婿竇誕趙慈景並繫獄隋將衛文昇陰世師欲殺之德明

謂文昇曰罪不在此輩殺之無傷於彼適足招怨文昇乃止及謁見高祖竟不自言時人稱其長者武德初拜考功郎中從太宗擊王世充頻有戰功封顯武男貞觀初歷常愛二州刺史尋卒弟德玄高宗時爲左相德玄子懷貞

懷貞少有名譽時兄弟宗族並以輿馬爲事懷貞獨折節自修衣服儉素聖曆中爲清河令治有能名俄歷越州都督揚州大都督府長史所在皆以清幹著稱神龍二年累遷御史大夫兼檢校雍州長史時韋庶人及安樂公主等干預朝政懷貞每諂順委曲取容改名從一以避后父之諱自是名稱曰損庶人微時乳母王氏本蠻婢也特封荅國夫人嫁爲懷貞妻俗謂乳母之婿爲阿奢懷貞每因謁見之次及進表疏列在官位必曰皇后阿奢時人或以國奢呼之初無慙色宦官用權懷貞尤所畏敬每視事聽訟見無賴者誤以接之監察御史魏傳弓嘗以內常侍輔信義尤縱暴將奏劾之懷貞曰輔常侍深爲安樂公主所信任權勢甚高言成禍

福何得輒有彈劾傳弓曰今王綱漸壞君子道消正由此輩擅權耳若得今日殺之明日受誅無所恨懷貞無以荅但固止之韋庶人敗左遷濠州司馬尋擢授益州大都督府長史以附會太平公主累拜侍中兼御史大夫代韋安石為尚書左僕射監脩國史賜爵魏國公睿宗為金仙玉真二公主創立兩觀料功甚多時議皆以為不可唯懷貞贊成其事躬自監役懷貞族弟詹事司直維鑑謂懷貞曰兄位極台衮當思獻可替否以輔明主奈何校量瓦木廁跡工匠之間欲令海內何所瞻仰也懷貞不能對而監作如故時人為之語曰竇僕射前為韋氏國耆後作公主邑丞言懷貞伏事公主同於邑官也先天二年太平公主逆謀事洩懷貞懼罪投水而死追戮其屍改姓毒氏德明族弟孝謹

孝謹刑部尚書誕之子昭成順聖皇后父也則天時歷太常少卿潤州刺史長壽二年后母龐氏被酷吏所陷誣與后呪詛不道孝謹左遷羅州司馬而卒子希城希球希瓘並流嶺南神龍初隨

例雪免景雲年追贈孝諡太尉邠國公希城襲爵玄宗即位加贈孝諡太保希城等以舅氏甚見優寵希城累遷太子少傅國公尋卒希球官至太子賓客封異國公開元二十七年卒及卒諡曰靖希瓘初賜爵畢國公後改名瓘初爲左散騎常侍及希球卒因授開府儀同三司玄宗以早失太后尤重外家瓘兄弟三人皆國公食實封瓘子鏐又尚玄宗女永昌長公主恩寵賜賚實爲厚矣而兄弟皆貪鄙過自封植瓘又甚之天寶七年有實勉潛交巫祝勉犯法瓘坐信其詭說被停官放歸田園尋以尊老又授開府儀同三司依舊朝會十三載十二月卒玄宗哭於行在贈司徒貲貲鉅萬瓘從父弟維鎔好學以撰著爲業時宗族咸以外戚崇飾輿馬維鎔獨清儉自守中書令張說黃門侍郎盧藏用給事中裴子餘皆與之親善官至水部郎中卒撰吉凶禮要二十卷行於代長孫敞丈德順聖皇后之叔父也仕隋爲左衛郎將煬帝幸江都留敞守京城禁苑公義旗入關率子弟迎謁於新豐從平京城以

功除將作少監出爲杞州刺史貞觀初坐贓免太宗以后親常令  
內給絹以供私費尋拜宗正少卿致仕加金紫光祿大夫累封平  
原郡公卒贈幽州都督諡曰良陪葬昭陵敞從父弟操周大司徒  
薛國公覽之子也武德中爲陝東道行臺金部郎中出爲陝州刺  
史自州東引水入城以代井汲百姓于今利之貞觀中歷洛州刺史  
益揚二州都督府長史並有善政二十三年以子詮尚太宗女新城  
公主拜歧州刺史永徽初加金紫光祿大夫賜爵樂壽男尋卒贈  
吏部尚書并州都督諡曰安詮官至尚衣奉御詮即侍中韓瑗妻  
弟也及瑗得罪事連於詮減死配流嶺州詮至硤所縣令希旨杖  
殺之詮之甥有趙持滿者工書善射力搏猛獸捷及奔馬而親仁  
愛衆多所交結京師無貴賤皆愛慕之初爲涼州長史嘗逐野馬  
自後射之無不洞于背腋邊人深伏之許劼宗懼其作難誣與詮  
及無忌同反及拷訊終無異詞且曰身可殺辭不可奪吏竟代爲  
款以殺之

武承嗣荊州都督士驥之孫則天順聖皇后兄子也初士驥娶相里氏生元慶元爽又娶楊氏生三女長適越王府功曹賀蘭越石次則天次適郭氏士驥卒後兄子惟良懷運及元爽等遇楊氏失禮及則天立爲皇后追贈士驥爲司徒周忠孝王封楊氏代國夫人賀蘭越石早卒封其妻爲韓國夫人尋又加贈士驥爲太尉楊氏改封爲榮國夫人時元慶仕爲宗正少卿元爽爲少府少監惟良爲衛尉少卿榮國夫人恨其疇日薄己諷皇后抗疏請出元慶等爲外職佯爲退讓其實惡之也於是元慶爲龍州刺史元爽爲濠州刺史惟良爲始州刺史元慶至州病卒元爽自濠州又配洮振州而死乾封年惟良與弟淄州刺史懷運以岳牧例集於泰山之下時韓國夫人女賀蘭氏在官中頗承恩寵則天意欲除之諷高宗幸其母宅因惟良等獻食則天密令人以毒藥貯賀蘭氏食中賀蘭氏食之暴卒歸罪於惟良懷運乃誅之仍諷百寮抗表請改其姓爲螟氏絕其屬籍元爽等緣坐配洮嶺外而死乃以韓國

夫人之子敏之爲士護嗣改姓武氏累拜左侍極蘭臺太史襲爵周國公仍令鳩集學士李嗣真吳兢之徒於蘭臺刊正經史并著撰傳記敏之既年少色美蒸於榮國夫人恃寵多愆犯則天頗不悅之咸亨二年榮國夫人卒則天出內大瑞錦令敏之造佛像追福敏之自隱用之又司衛少卿楊思儉女有殊色高宗及則天自選以爲太子妃成有定日矣敏之又逼而淫焉及在榮國服內私釋衰經著吉服奏妓樂時太平公主尚幼往來榮國之家宮人侍行又嘗爲敏之所逼俄而姦汙事發配流雷州行至韶州以馬韁自縊而死承嗣元爽子也敏之死後自嶺南召還拜尚衣奉御襲祖爵周國公俄遷祕書監則天臨朝追尊士護爲忠孝太皇置崇先府官屬五代祖已下皆爲王嗣聖元年以承嗣爲禮部尚書尋除太常卿同中書門下三品垂拱中轉春官尚書依舊知政事載初元年代蘇良嗣爲文昌左相同鳳閣鸞臺三品兼知內史事天授元年於東都創置武氏七廟追尊周文王爲始祖文皇帝王子



武為睿祖康皇帝云武氏之先也后五代祖贈太原靖王居常為嚴祖成皇帝高祖贈趙肅恭王克己為肅祖章敬皇帝曾祖贈魏康王儉為烈祖昭安皇帝祖贈周安成王華為顯祖文穆皇帝考忠孝太皇為太祖孝明高皇帝妣皆隨帝號曰皇后元慶為梁憲王元爽為魏德王又追封伯父及兄弟俱為王諸姑姊為長公主於是封承嗣為魏王元慶子夏官尚書三思為梁王后從父兄子納言攸寧為建昌王太子通事舍人攸歸為九江王司禮卿重規為廣平王左衛親府中郎將載德為潁川王右衛將軍攸暨為千乘王司農卿懿宗為河內王左千牛中郎將嗣宗為臨川王右衛勳二府中郎將攸宜為建安王尚乘直長攸望為會稽王太子通事舍人攸緒為安平王攸止為恒安王又封承嗣男延基為南陽王延秀為淮陽王三思男崇訓為高陽王崇烈為新安王后兄子贈陳王承業男延暉為嗣陳王延祚為咸安王承嗣嘗諷則天革命盡誅皇室諸王及公卿中不附己者承嗣從父第三思又盛贊其

計天下于今寃之俄又賜承嗣實封千戶仍監脩國史承嗣自爲  
次當爲皇儲令鳳閣舍人張嘉福諷諭百姓抗表陳請則天竟不  
許如意元年授特進尋拜太子太保罷知政事承嗣以不得立爲  
皇太子怏怏而卒贈太尉并州牧諡曰宣子延基襲爵則天避其  
父名封爲繼魏王尋與其妻永泰郡主及懿德太子等話及張易  
之兄弟出入宮中恐有不利後忿爭不協俄之則天聞而大怒咸  
令自殺復以承嗣次子延義爲繼魏王中宗即位侍中敬暉等以  
唐室中興武氏諸王宜削其王爵乃率羣官上表曰臣聞神器者  
天下之至公必歸乎有德皇極者域中之大寶必順乎天命歷考  
前古詳觀帝業豈不並興莫有二主故三皇氏沒而五帝氏興夏  
商氏衰而周漢氏作何則帝王之曆數必應乎五行水盛則火衰  
木衰則金盛天地之運也合乎四時春往則夏來暑退則寒集則  
知五行之數也帝王不可違違之則宗社不安生人不理四時之  
序天地不能變變之則霜露不均水旱交錯自有隋失御海內崩

離天曆之重歸于唐室萬方樂業荷撥亂之功三聖重光布生成之德可謂有功於四海有德於蒸人自弘道遏密生靈降禍百辟哀號如喪考妣則天皇后臨御帝圖明目達聰躬親庶績則有讒邪凶孽誣惑歡德構害宗枝誅夷殆盡英藩賢戚百不一存餘類在者投竄荒裔冤酷人神感傷天地忠臣義士實所痛心自天授之際時稱改革武家子姪咸樹封建十餘年間實亦榮極于時唐室藩屏豈得並封故知事有升降時使然也今則天皇帝厭倦萬機神器大寶重歸陛下百姓謳歌欣復唐業上至卿士下及蒼生黃髮之倫童兒之輩莫不歡欣舞抃如見父母豈不以唐家恩德感幽祇之心陛下仁明順天下之望皇業重構聖祚中興神祇之道有助於先德矣黎人之誠無負於陛下矣臣又聞之業不兩盛事不兩大故天無二日土無二王前聖之格言先哲之明誠自皇明反正天命惟新武家諸王封建依舊生者既加茅土死者仍追賦邑萬姓失望卿士寒心何則開闢已來罕有斯理帝王之道實無

此法陛下縱欲開恩以行私惠豈可達五行之曆數乎乖四時之寒暑乎又海內衆情朝廷竊議爲武氏諸王身計亦通將有損何則處之未得其所居之實恐不安陛下雖欲寵之翻乃陷之不遵古典故也且唐曆有歸周命已去爵重則難保祿薄則易全又則天皇帝親政之時武氏諸王亦分外職今居京輦不降舊封天下之心竊將不可陛下縱欲敦崇外戚曲沐恩貸奈宗廟社稷之計何奈卿士黎庶之議何伏願陛下爲社稷之遠圖割私情之小愛內崇經邦之要外順遐邇之心豈不固宗社之基允人靈之願則陛下巍巍之業貫三光而洞九泉親親之義上有倫而下有序臣特承榮寵思竭丹赤旣爲唐臣實爲唐計伏乞聖慈俯垂矜納中書舍人岑羲之詞也上荅曰朕嘗因暇景博覽前脩帝籍皇圖略稽其迹至若三靈肇判三才聿興驪連栗陸之辰尊虛大庭之日時猶朴略未著圖書泊乎出震應期畫八卦而成象炎皇御曆播百穀以興農車服創於軒轅之朝曆象建於唐堯之代封建之事

關爾無聞自周漢已來方崇藩屏至於三微更王五運迭興以古  
揆今事迹有爽比者別宗撫膺異姓興邦伏以則天大聖皇帝內  
輔外臨將五十載在朕躬則爲慈母於士庶即是明君往者垂拱  
之中嗣皇臨政當此之際魯衛並存及乎全節興妖瑯瑯構逆災  
連七國豐結三監既行大義之懷遂有泣誅之事周唐革命蓋爲  
從權子姪封王國之常典卿等表云天授之際武家封建唐家藩  
屏豈得並封者至如千里一房不預逆謀還依姓李無改舊憲豈非  
善惡區分申明逆順矣今以聖上垂豫高枕怡神委政朕躬纂承  
丕緒昨者二月之首攸旣孽等屢請削封朕獨斷襟懷不依來請昔  
漢祖以布衣取天下猶封異姓爲王況朕以累聖開基豈可削封  
外族羣公等以天無二日土無二主抗表紫庭用申丹懇者然以賞  
罰之典經國大綱攸旣三思皆悉預告凶啓雖不親冒白刃而亦  
早獻丹誠今若却除舊封便慮有功難勸於是降封梁王三思爲  
德靜郡王量減實封二百戶定王駙馬都尉攸旣爲樂壽郡王河

內郡王懿宗爲耿國公建昌郡王攸寧爲江國公會稽郡王攸望  
爲鄴國公臨川郡王嗣宗爲管國公建安郡王攸宜爲息國公高  
平郡王重規爲鄆國公繼魏王延義爲魏國公安平郡王攸緒爲  
巢國公高平郡王駙馬都尉崇訓爲豐國公淮陽郡王延秀爲  
栢國公咸安郡王延祚爲咸安郡公中宗時嗣宗至曹州刺史攸  
宜工部尚書重規岐州刺史相次病卒攸望至太常卿左遷春州  
司馬而死延秀伏誅後武氏宗屬緣坐誅死及配流殆將盡矣先  
天二年制削士護帝號依舊追贈太原王妻楊氏亦削后號依舊  
爲太原王妃

延秀承嗣第二子也則天時突厥默啜上言有女請和親制延秀  
與閭知微俱往突厥將親迎默啜女爲妻旣而默啜執知微入寇  
趙定等州故延秀久不得還神龍初默啜更請通和先令延秀送  
款始得歸封栢國公又授左衛中郎將時武崇訓爲安樂公主婿  
即延秀從父兄數引至主第延秀久在蕃中解突厥語常於主第

延秀唱突厥歌作胡旋舞有姿媚主甚喜之及崇訓死延秀得幸  
遂尚公主韋后所生男女中最小初中宗遷於房州欲達州境生  
於路次性惠敏容質秀絕中宗韋后愛寵日深恣其所欲奏請無  
不允許恃寵橫縱權傾天下自王侯宰相已下除拜多出其門所  
營第宅并造安樂佛寺擬於宮殿精巧過之令楊務廉於城西造  
定昆池於其莊延袤數里出降之時以皇后仗發於宮中中宗與  
韋后御安福門觀之燈燭供擬徹明如晝延秀拜席曰授太常卿  
兼右衛將軍駙馬都尉改封恒國公實封五百戶廢休祥宅於金  
城坊造宅窮極壯麗帑藏為之空竭崇訓子數歲因加金紫光祿  
大夫太常卿同正員左衛將軍封鎬國公賜實封五百戶以嗣其  
父公主產男滿月中宗韋后幸其第就第放赦遣宰臣李嶠文  
士宋之問沈佺期張說閻朝隱等數百人賦詩美之延秀既恃恩  
放縱無所忌憚又公主府倉曹符鳳知延秀有不臣之心遂說曰  
今天下蒼生猶以武氏為念大周必可再興按讖書云黑衣神孫

披天裳駙馬即神皇之孫也每勸令著皂襖子以應之及韋庶人敗延秀與公主在內宅格戰良久皆斬之後追貶爲敎逆庶人

三思元慶子也少以后族累轉右衛將軍則天臨朝擢拜夏官尚書及革命封梁王賜實封一千戶尋拜天官尚書證聖元年轉春官尚書監修國史聖曆元年檢校內史二年進拜特進太子賓客仍並依舊監修國史三思略涉文史性傾巧便僻善事人由是特蒙信任則天數幸其第賞賜甚厚時薛懷義張易之昌宗皆承恩顧三思與承嗣每折節事之懷義欲乘馬承嗣三思必爲之執轡又贈昌宗詩盛稱昌宗才只是王子晉後身仍令朝士遞相屬和三思又以則天厭居深宮又欲與張易之昌宗等扈從馳騁以弄其權乃請創造三陽宮于嵩高山興泰宮于萬壽山請則天每歲臨幸前後工役甚衆百姓怨之神龍初進拜司空同中書門下三品加實封五百戶固辭不受未幾隨例降封爲德靜郡王量減實封二百戶尋拜左散騎常侍則天遺制令復其所減實封初劾暉



等立功後掌知國政三思慮其更爲己患而令其子崇訓因安樂公主構誣昉暉等並流于嶺表而死自是三思威權日盛軍國政事多所參綜昉暉等所斥黜者皆能引復舊職令百官復修則天之法時人皆言其陰懷篡逆以比曹孟德司馬仲達雍州人韋月將高軫等並上疏言三思父子必爲逆亂三思知而求索其罪有司希旨奏月將坐當并市軫配流嶺外黃門侍郎宋璟執奏云月將所犯不合至死三思怒責斥宋璟爲外職三思旣猜嫉正士嘗言不知何等名作好人唯有向我好者是好人耳又與其所親兵部尚書宗楚客將作大匠宗晉卿太府卿紀處訥鴻臚卿甘元東遷相引致干黷時政侍御史周利用冉祖雍太僕丞李俊光祿丞宋之遜監察御史姚紹之等五人常爲其耳目時人呼爲三思五狗中宗尋又制武氏崇恩廟一依天授時舊禮享祭其吳陵順陵並置官員皆三思意也三思旣與韋庶人及上官昭容私通嘗忌節愍太子又因安樂公主密謀廢黜之三年七月太子率羽林大將軍李多祚等

發左右羽林兵殺三思及其子崇訓于其第并殺其親黨十餘人  
俄而事變太子旣死中宗爲三思舉哀廢朝五日贈太尉追封梁  
王諡曰宣安樂公主又以節愍太子首致祭于三思及崇訓靈柩  
前睿宗踐祚以三思父子俱有逆節制令斲棺暴屍平其墳墓  
崇訓三思第二子也則天時封爲高陽郡王長安中尚安樂郡主  
時三思用事於朝欲寵其禮中宗爲太子在東宮三思宅在天津  
橋南自重光門內行親迎禮歸於其宅三思又令宰臣李嶠蘇味  
道詞人沈佺期宋之問徐彥伯張說閻朝隱崔融崔湜鄭愔等賦  
花燭行以美之其時張易之昌宗宗楚客兄弟貴盛時假詞於人  
皆有新句崇訓授左衛中郎將神龍元年拜駙馬都尉遷太常卿  
兼左衛將軍降封鄴國公仍賜實封五百戶尋徙封鎬國公二年  
兼太子賓客攝左衛將軍及爲節愍太子所殺優制贈開府儀同  
三司追贈魯王諡曰忠

懿宗則天伯父士逸之孫也父元忠高宗時仕至倉部郎中天授年

封士逸爲蜀王懿宗封爲河內郡王歷遷洛州長史左金吾衛大將軍萬歲通天年中契丹賊帥孫萬榮寇河北命懿宗爲大摠管討之軍次趙州及聞賊將至異州懿宗懼便欲弃軍而遁人或謂曰賊衆極多然其軍無輜重以抄掠爲資若按兵以守勢必離散因而擊之可有大功也懿宗不聽遂退據相州時人嗤其怯懦由是賊衆進屠趙州而去尋又令懿宗安撫河北諸州先是百姓有脅從賊衆後得歸來者懿宗以爲同反摠殺之仍生剗取其膽後行刑流血盈前言笑自若初孫萬榮別帥何阿小攻陷異州亦多屠害士女至是時人號懿宗與阿小爲兩何謂之語曰唯此兩何殺人最多懿宗又自天授已來嘗受中旨推鞠制獄王公大臣多被陷成其罪時人以爲周興來俊臣之亞焉神龍初隨例降爵封耿國公累轉懷州刺史尋卒

攸暨則天伯父士讓孫也天授中封士讓爲楚王攸暨封千乘郡王賜爵實封三百戶兄攸寧爲建昌郡王實封四百戶攸寧歷遷

鳳閣侍郎納言冬官尚書病卒攸暨初爲右衛中郎將尚太平公王授駙馬都尉累遷右衛將軍進封定王又加實封三百戶俄又改安定郡王歷遷司禮卿左散騎常侍加特進神龍中拜司徒復封定王實封滿一千戶固辭不拜尋而隨例降封樂壽郡王拜右散騎常侍加開府儀同三司延秀等誅後又降封楚國公延和元年卒贈太尉并州大都督追封定王尋以公主謀逆令平毀其墓

太平公主者高宗少女也以則天所生特承恩寵初永隆年降駙馬薛紹紹垂拱中被誣告與諸王連謀伏誅則天私殺攸暨之妻以配主焉公主豐碩方額廣頤多權略則天以爲類己每預謀議宮禁嚴峻事不令洩公主亦畏懼自檢但崇飾邸第二十餘年天下獨有太平一公主父爲帝母爲帝夫爲親王子爲郡王貴盛無比永淳已前朝制親王食實封八百戶有至一千戶公主出降三百戶公主加五十戶太平食陽沐之邑一千二百戶聖曆初加至三千戶神龍元年預誅張易之謀有功進號鎮國太平公主相王加號安

國相王並食實封通前五千戶賞賜不可勝紀公主薛氏二男二女武氏二男一女並食實封又相王衛王重俊成王千里宅遣衛士宿衛環其所居十步置一仗舍持兵巡徼同於宮禁太平長寧安樂三公主置鋪一如親王二年正月置公主府景龍二年公主男崇簡崇敏崇行同授三品與漁陽王兄弟四人同制時中宗仁善韋后上官昭容用事禁中皆以爲智謀不及公主甚憚之公主日益豪橫進達朝士多至大官詞人後進造其門者或有貧窘則遺之金帛士亦翕然稱之及唐隆元年六月韋后作逆稱制僞尊溫王立宗居臨淄邸憤之將清內難公主又預其謀令男崇簡從之及立溫王數日天下之心歸於相府難爲其議公主入啓幼主以王室多故資於長君乃提下幼主因與立宗大臣尊立睿宗公主頻著大勲益尊重乃加實封五千戶通前滿一萬戶公主子崇行崇敏崇簡三人封異姓王宗行國子祭酒四人九卿三品每入奏事坐語移時所言皆聽薦人或驟歷清職或至南北衙將相權移人

主軍國大政事必參決如不朝謁則宰臣就第議其可否公主由是滋驕田園遍於近甸膏腴而市易造作器物吳蜀嶺南供送相屬於路綺䟽寶帳音樂輿乘同於宮掖侍兒披羅綺常數百人蒼頭監嫗必盈千數外州償狗馬玩好滋味不可紀極有胡僧惠範家富於財寶善事權貴公主與之私奏爲聖善寺主加三品封公殖貨沫於江劔公主懼玄宗英武乃連結將相專謀異計其時宰相七人五出公主門常元楷李慈掌禁兵常私謁公主先天二年七月玄宗在武德殿事漸危逼乃勒兵誅其黨竇懷貞蕭至忠岑羲等公主遽入山寺數日方出賜死于家公主諸子及黨與死者數十人籍其家財貨山積珍奇寶物侔於御府馬牧羊牧田園質庫數年徵斂不盡惠範家產亦數十萬貫

攸緒惟良子也少有志行天授中封安平郡王歷遷殿中監出爲揚州大都督府長史聖曆中弃官隱于嵩山以琴書藥餌爲務中宗即位以安車備禮徵之降書曰朕聞大隱忘情不去朝市至人

無迹何所凝滯王高標峻尚雅操孤貞有成一之用弘體二之德學  
究深遠理實精微草芥貂蟬錙銖纓紱蔭松山而辭竹苑去朱邸  
而卧青溪逍遙林壑傲睨箕穎有年歲矣朕虔膺聖曆重闡皇  
基保乂邦家寧輯區寓求賢採彥俯谷窺山王之所居接近嵩岳  
長望高烈思滿風煙駐蹕喬巖追尋大隗鳴鑾岫岫詢訪廣成機  
務那繁有懷莫遂今遣國子司業杜慎盈以禮命徵辟掃蕩龍之  
第虛稷契之筵神化丹青朕之志也豈以黃屋之貴傾彼白雲之心  
通變之宜希從降志延貯閭闔若在汾陽攸緒應召至都授太子  
賓客尋請歸嵩山制從之今京官五品已上踐送于定鼎門外及  
三思延秀等構逆諸武多坐誅戮唯攸緒以隱居不預其禍時論  
美之睿宗即位又降勅曰頃以賊臣結黨后族擅權扇動宮闈肆  
行鴆毒靈祇所感茲惡伏誅今得宗社乂安天地交泰卿乂厭簪  
紱早慕林泉守道不回見機而作興言高尚有足嘉稱但怒用不  
遷罪無相及爲善有驗卿之謂與或慮驚疑故令慰謝其見重如

此尋徵爲太子賓客不就開元二年收緒又請就廬山居止制不許仍令州縣數加存問不令外人侵擾十一年卒年六十九

薛懷義者京兆鄠縣人本姓馮名小寶以鬻臺貨爲業偉形神有膂力爲市於洛陽得幸於千金公主侍兒公主知之入宮言曰小寶有非常材用可以近侍因得召見恩遇日深則天欲隱其迹便於出入禁中乃度爲僧又以懷義非士族乃改姓薛令與太平公主壻薛紹合族令紹以季父事之自是與洛陽大德僧法明處一惠儼稜行感德感知靜軌宣政等在內道場念誦懷義出入乘厖馬中官侍從諸武朝貴匍匐禮謁人間呼爲薛師垂拱初說則天於故洛陽城西脩故白馬寺懷義自護作寺成自爲寺主頗恃恩狂蹶其下犯法人不<sub>敢</sub>言右臺御史馮思勗屢以法劾之懷義遇昂於途令從者歐之幾死又於建春門內敬愛寺別造殿宇改名佛授記寺垂拱四年<sub>拆</sub>乾元殿於其地造明堂懷義充使督作凡役數萬人曳一大木千人置號頭頭一闌千人齊和明堂大屋凡三層



計高三百尺又於明堂北起天堂廣袤亞於明堂懷義以功拜左威衛大將軍封梁國公永昌中突厥默啜犯邊以懷義爲清平道大摠管率軍擊之至單于臺刻石紀功而還加輔國大將軍進右衛大將軍改封鄂國公柱國賜帛二千段懷義與法明等造大雲經陳符命言則天是彌勒下生作閻浮提主唐氏合微故則天革命稱周懷義與法明等九人並封縣公賜物有差皆賜紫袈裟銀龜袋其僞大雲經頒於天下寺各藏一本令昇高座講說則天將革命誅殺宗屬諸王唯千金公主以巧媚善進奉獨存抗跡請以則天爲母因得曲加恩寵改邑號爲延安大長公主加實封賜姓武氏以子克又娶魏王武承嗣女內門參問不限早晚見則盡歡長壽二年默啜復犯塞又以懷義爲代北道行軍大摠管以李多祚蘇宏暉爲將未行改朔方道行軍大摠管以內史李昭德爲行軍長史鳳閣侍郎平章事蘇味道爲行軍司馬契苾明曹仁師沙吒忠義等十八將軍以討之未行虜退乃止懷義後厯入宮中多

居白馬寺刺血畫大像選有膂力白丁度爲僧數滿千人侍御史周矩疑其姦奏請劾之不許固請之則天曰卿且退朕即令去矩至臺薛師亦至乘馬踴階而下便袒腹於牀矩召臺吏將按之遽乘馬而去矩具以聞則天曰此道人風病不可苦問所度僧任卿勘當矩按之窮其狀以聞諸僧悉配遠州遷矩天官自外郎竟爲薛師所構下獄免官後有御醫沈南璆得幸薛師恩漸衰恨怒頗甚證聖中乃焚明堂天堂並爲灰燼則天愧而隱之又令懷義充使督作乃於明堂下置九州鼎鑄銅爲十二屬形象置於北辰位皆高一丈懷義率人作號頭安置之其後益驕倨則天惡之令太平公主擇膂力婦人數十密防慮之人有發其陰謀者太平公主乳母張夫人令壯士縛而縊殺之以輦車載屍送白馬寺其侍者僧徒皆誅竄遠惡處

韋溫中宗韋庶人從父兄也父玄儼高宗末官至許州刺史玄儼弟玄貞初爲普州叅軍以女爲皇太子妃擢拜豫州刺史中宗嗣

位妃爲后及帝降爲廬陵王玄貞配流欽州而死后母崔氏爲欽  
州首領竇承兄弟所殺玄貞有四子洵浩洞岬亦死於容州后二  
妹逃竄獲免間行歸長安及中宗復位韋氏復爲皇后其日追贈  
玄貞爲上洛郡王左拾遺賈虛已上疏諫曰孔子曰惟名與器不可  
以假人且非李氏而王自古盟書所并今陛下創制謀始垂範將  
來爲皇王令圖子孫明鏡臣復未幾后族有私臣雖庸愚尚知未  
可史官執簡必是直書今萬姓顚然聞一善令莫不途歌里頌延  
頸向風欣然慕化日恐不及陛下奈何行私惠使樵夫議之即先  
朝贈太原王躬鑒不遠同雲生於膚寸尋木起於孽莖誠可惜也  
煥汗旣行難改成命臣望請皇后抗表固辭使天下知弘讓之風  
彤管著冲謙之德是則巍巍聖鑒無得而稱跡奏不省尋又追贈  
玄貞爲太師雍州牧益州大都督玄儼爲特進并州大都督魯國  
公遣使迎玄貞及崔氏喪柩歸京師又遣廣州都督周仁軌率兵  
討斬竇承兄弟以其首祭于崔氏擢拜仁軌左羽林大將軍賜爵

汝南郡公食實封五百戶及玄貞等柩將至上與后登長樂宮望  
喪而位加贈玄貞爲鄧王謚曰文獻仍號其廟曰懷德陵曰榮先  
各置官員并給戶一百人守衛灑掃又贈玄貞子洵爲吏部尚書  
汝南郡王浩太常卿武陵郡王洞衛尉卿淮南郡王祉太僕卿上  
蔡郡王亦遣使迎其喪柩於京師溫神龍中累遷禮部尚書封魯  
國公弟濟左羽林將軍封曹國公后妹夫陸頌爲國子祭酒馮太  
和爲太常少卿太和尋卒又適嗣號王邕濟子捷尚成安公主溫  
從祖弟濯尚定安公主皆拜駙馬都尉景龍三年溫遷太子少保  
同中書門下三品仍遷授揚州大都督溫等旣居榮要燻灼朝野  
時人比之武氏濟及陸頌相次病卒賻贈甚厚及中宗崩后令溫揔  
知內外兵馬守援宮掖又引從子播族弟璿弟捷濯等分掌屯營  
及左右羽林軍臨淄王討韋氏溫等皆坐斬宗族無少長皆死語  
在韋庶人傳睿宗即位仍令削平玄貞及洵等墳墓

王仁皎玄宗王庶人之父也景龍中官至長上果毅玄宗即位以后

父歷將作大匠太僕卿遷開府儀同三司封祁國公仁皎不預朝政但厚自奉養積子女財貨而已開元七年卒贈太尉官供葬事柩車既發上於望春亭遙望之令張說爲其碑文玄宗親書石焉子守一

守一與后雙生守一與玄宗有舊及上登極以清陽公主妻之從討蕭肅至忠岑羲等有功自尚乘奉御遷殿中少監特封晉國公累轉太子少保父卒襲爵祁國公十一年坐與庶人潛通左道左遷柳州司馬行至藍田驛賜死守一性貪鄙積財巨萬及籍沒其家財帛不可勝計

吳淑章徽皇后之弟也濮州濮陽人祖神泉位終縣令父珪益州郫縣丞寶曆二年代宗始封拜外族贈神泉司徒令珪太尉令珪母弟前宣城令令瑤爲開府儀同三司太子家令封濮陽郡公中郎將令瑜爲開府儀同三司太子諭德濟陽郡公淑時爲盛王府錄事參軍拜開府儀同三司太子詹事濮陽郡公以元舅遷鴈臚

少卿金吾將軍建中初遷大將軍敍雖居戚屬恭遜謙和人皆重之經帥之亂從幸奉天盧杞白志貞謂德宗曰臣細觀朱泚心迹必不至爲我首佇當効順宜擇大臣一人入京師慰諭以觀其心上召從幸羣臣言之皆憚其行敍起奏曰不以臣才望無堪臣願此行德宗甚悅敍退而謂人曰人臣食君之祿死君之難臨危自計非忠也吾忝戚屬今日委身於賊誠知必死不欲聖情慊於無人犯難也即日齋詔見泚深陳上待屬之意時泚逆謀已定貌雖從命而心已異乃留敍於客省責被害上聞之悲悼不已贈太子太傅賜其家實封二百戶一子五品正員官勅收城日葬事官給弟湊湊寶曆中與兄敍同日開府授太子詹事俱封濮陽郡公湊以兄弟三品固辭太過乞授卑官乃以湊檢校太子賓客兼太子家令充宅王使累轉左金吾衛大將軍湊小心謹慎智識周敏特承顧問偏見委信大曆中滑帥令狐彰汴帥田神功相次歿於理所時藩方兵驕乘戎帥喪亡人情多梗代宗命湊銜命撫慰至必委

曲說諭隨所欲爲之奏請皆得軍民和協帝深重之宰臣元載弄權招致賄賂醜迹日彰帝惡之將加之法恐左右洩漏無與言者唯與凌密計圖之及收載於內侍省同列王縉其黨楊炎王昂韓洄包佶韓會等皆當從坐籍沒凌諫救百端言法宜從寬縉等從坐理不至死若不降以等差一例極刑恐虧損聖德縣是縉等得減死誅貶之大曆末丁繼母喪免建中初起爲右衛將軍兼通州刺史貞元初入爲太子賓客出爲福州刺史御史中丞福建觀察使爲政勤儉清苦美譽自間宰相竇參以私怨惡之數加譖毀又言凌風病不任趨馳德宗召凌至京師對于別殿上令殿上行走以驗其病否由是悟參之誣因是惡參尋以凌爲陝州大都督府長史陝虢觀察使以代參之黨李翼會劉玄佐卒以凌檢校兵部尚書汴州刺史御史大夫宣武軍節度使時汴州軍亂殺牙將曹金岸縣令李邁謀立玄佐子士寧上將遣兵送凌赴鎮召宰臣議竇參深沮其行恐軍中拒命乃召凌迴授右金吾衛大將軍而以

梁宋節鉞授士寧貞元十四年春夏旱穀貴人多流亡京兆尹韓  
皋以政事不理黜官上召湊面授京兆尹即日令視事經宿方下  
制湊孜孜爲理以勤儉爲務人樂其政時宮中選內官買物於市  
倚勢強買物不充價人畏而避之呼爲宮市掌賦者多與中貴人  
交結假借不言其弊湊爲京尹便殿從容論之曰物議以中人買物  
於市稍不便於人此事甚細虛掇詠議凡官中所須責臣可辦不  
必更差中使若以臣府縣外吏不合預聞官中所須則乞選內官  
年高謹重者充宮市令庶息人閒論議又奏掌閑驥騎飛龍內園  
芙蓉及禁軍諸司等使雜供手力資課太多量宜減省上多從之  
初府掾吏以湊起自戚藩不諳簿領凡有疑獄難決之事多候湊  
將出時方呈冀免指撻瑕病湊雖蒼卒閱視必指其姦倖之處下  
筆決斷無毫釐之差掾吏非大過不行笞責而召面按問詰責而  
釋之吏尤惕厲庶務咸舉文敬太子義章公主相繼薨歿上深追  
念葬送之儀頗厚召集工役載土築墳妨民農務湊候上顧問極



言之宗屬門吏以湊論諫太繁恐上厭苦每以簡約規之湊曰聖上明哲憂勞四海必不以公主太子之鍾念而忽疲民但人多順旨不言若再三啓諫必動宸情則生民受賜長吏不言是爲阿旨如窮民上訴罪在何人議者重之以能政兼兵部尚書官街樹缺所司植榆以補之湊曰榆非九衢之玩亟命易之以槐及槐陰成而湊卒人指樹而懷之湊於德宗爲老舅漢魏故事多退居散地纔免罪戾而已湊自貞元已來特承恩顧歷中外顯貴雖聖獎隆深亦由湊小心辦事奉職有方故也湊既疾不召巫醫藥不入口家人泣而勉之對曰吾以凡才濫因外戚進用起家便授三品歷顯位四十年壽登七十爲人足矣更欲何求古之以親戚進用者罕有善終吾得歸全以待先人幸也德宗知之令御醫進藥不獲已服之貞元十六年四月卒時年七十一贈尚書左僕射罷朝一日

竇觀昭成皇后族姪父光華原尉觀以親蔭釋褐右衛率府兵曹參軍廊坊節度臧希讓奏爲判官累授監察殿中侍御史檢校

工部員外郎坊州刺史興元元年討李懷光於河中詔覲以坊州兵七百人屯郿陽賊平以功兼御史中丞遷同州刺史入朝爲戶部侍郎覲無他才伎爲吏有計數又以韓滉子壻故藩府辟召遂歷牧守宰相竇參覲再從姪參少依覲及參秉政力薦於朝故有貳卿之拜數月爲揚州大都督府長史御史大夫充淮南節度副大使知節度事旣非德舉人咸薄之赴鎮旬日暴卒詔贈禮部尚書

柳晟者肅宗皇后之甥母和政公主父潭官至太僕卿駙馬都尉晟少無檢操代宗於諸甥之中特加撫鞠俾與太子諸王同學授詩書恩寵罕比累試太常卿德宗即位以與晟幼同硯席尤親之涇師之亂從幸奉天晟密啓曰願受詔入京城遊說羣賊異其攜貳德宗壯而許之晟與賊帥多有舊出入其門說誘之事洩爲朱泚所擒械之於獄晟有力乃於獄中穿垣破械而遁落髮爲僧閒道歸行在遷將作少監元和初檢校工部尚書興元尹山南西道節

度使罷鎮入朝以違詔進奉爲御史元稹所劾詔宥之俄充入迴  
鶻冊立使復命遷左金吾衛大將軍元和十三年卒贈太子少保  
王子顏瑯瑯臨沂人莊憲皇后之父也祖思訥少從軍累試太子  
賓客父難得有勇決善騎射天寶初爲河源軍使吐蕃贊普王子  
郎支都有勇乘諳真馬寶鈿裝鞍出陣求鬪無敢與校者難得挾  
槍奮馬突前刺殺郎支都斬其首傳於京師軍還玄宗召見之令  
於殿前乘馬挾槍作刺郎支都之狀賜以錦袍金帶累拜金吾將  
軍同正員天寶七載從哥舒翰擊吐蕃於積石軍吐谷渾王子悉  
弄參及子壻悉賴藏而還累拜左武衛將軍關西遊弈使九載擊  
吐蕃收五橋拔樹敦城補白水軍使十三載從收九曲加特進祿山  
之叛從哥舒翰戰於潼關關門不守從肅宗幸靈武時行在關軍  
賞難得進絹三千疋及金銀器等至德初試衛尉卿興平軍使兼  
鳳翔都知兵馬使進收京城與賊軍戰其下斬元曜戰酣墮馬難  
得馳救之賊射之中眉皮穿披下鄣目難得自拔去箭并皮掣落

馳馬復戰血沫被面而抗賊不已肅宗深嘉之從郭子儀攻安慶緒於相州累封瑯琊郡公英武軍使寶應二年卒贈潞州大都督子顏少從父征役累官金紫光祿大夫檢校衛尉卿生后而卒順宗內禪以后生憲宗皇帝襲贈先代贈思敬司徒難得太傅子顏太師顏子重榮官至福王傳用官至太子賓客金吾將軍贊曰戚里之賢避寵畏權不卹禍患鮮能保全福盈者敗勢盛者顛武之惟良明於自然

唐書列傳卷第一百三十三

[illegible]

唐書列傳卷第二百三十四

劉

昀

等修

宦官

楊思勗

高力士

袁思藝

李輔國

程元振

魚朝恩

劉希暹

賈明觀

竇文場

霍仙舟

俱文珍

陸承璀

王守澄

仇士良

田令孜

楊復光

楊復恭

劉季述

王奉先

韓全誨

唐制有內侍省其官員內侍四人內常侍六人內謁者監六人內

給事八人謁者十二人典引十八人寺伯二人寺人六人別有五局掖

廷局掌宮人簿籍籍宮闈局掌宮內門禁其屬有掌扇給使等

負奚官局掌宮人疾病死喪內僕局掌宮中供帳燈燭五局有令

丞皆內官爲之貞觀中太宗定制內侍省不置三品官內侍是長

官階四品至永淳末向七十年權未假於內官但在閣門守御黃衣

廩食而已則天稱制二十年間差增負位中宗性慈務崇恩貸神

龍中宦官三千餘人超授七品以上負外官者千餘人然衣朱紫者尚寡玄宗在位既久崇重官禁中官稍稱旨者即授三品左右監門將軍得門施棨戟開元天寶中長安大內大明興慶三宮皇子十宅院皇孫百孫院東都大內上陽兩宮大率官女四萬人品官黃衣已上三千人衣朱紫者千餘人後李輔國從幸靈武程元振翼衛代宗怙寵邀君乃至守三公封王爵干預國政亦未全握兵權代宗時子儀北伐親王東討遂特立觀軍容宣慰使命魚朝恩爲之然自有統帥亦監領而已德宗避涇師之難幸山南內官竇文場霍仙鳴擁從賊平之後不欲武臣典重兵其左右神策天威等軍欲委官者主之乃置護軍中尉兩員中護軍兩員分掌禁兵以文場仙鳴爲兩中尉自是神策親軍之權全歸於官者矣自貞元之後威權日熾蘭錡將臣率皆子蓄藩方戎帥必以賄成萬機之與奪任情九重之廢立由己元和之季毒被乘輿長慶續隆徒鬱抗干之憤臨軒暇逸旋忘塗地之寃而易月未除滔天盡

怒甲第名園之賜莫匪伶官朱袍紫綬之榮無非巷伯是時高品  
白身之數四千六百一十八人內則參秉戎權外則監臨藩嶽文宗包  
祖宗之恥痛肘腋之讎思翦厲階去其太甚宋申錫言未出口尋以  
破家李仲言謀之不臧幾何敗國何寶之徒轉賊讓珪之勢尤狂  
五十餘年禍胎踰煬昭宗之季所不忍聞臣遍覽前書考茲覆轍  
試言大較庶竭其源何者自書契已來不無閭寺況垂之天象  
備見職官即如秦皇漢武宮闈之內宦官以侍宴遊徧英膏之君  
措置斯得及荒僻之主奢蕩是求委藩聚蹶橋之徒飾姬姜狗馬  
之玩外言不入惟欲是從雖並列五侯猶爲賞薄遍封萬戶尚慊  
恩疎苟思捧日之勤遂據迴天之勢及三綱錯亂四海崩離素本  
初之入北宮無鬚殆盡石井閔之攻鄴下內豎咸誅旋至殄瘁邦  
家不獨感傷和氣淫刑斯逞可爲傷心向使不假威權但趨帷扆  
何止四星終吉抑亦萬乘延洪昔敗貝爲社鼠之喻不其然乎今錄  
楊思勗已下所行事以爲鑒誠云



楊思勗本姓蘇羅州石城人爲內官楊氏所養以閹從事內侍省預  
討李多祚功超拜銀青光祿大夫行內常侍思勗有膂力殘忍好殺  
從臨淄王誅韋氏遂從王爲爪士累遷右監門衛將軍開元初安南  
首領梅玄成叛自稱黑帝與林邑眞臘國通謀陷安南府詔思勗將  
兵討之思勗至嶺表鳩募首領子弟兵馬十餘萬取伏波故道以進  
出其不意玄成遽聞兵至遑惑計無所出竟爲官軍所擒臨陣斬之  
盡誅其黨與積屍爲京觀而還十二年五谿首領覃行璋作亂思勗  
復授詔率兵討之生擒行璋斬其黨三萬餘級以軍功累加輔國大  
將軍後從東封又加驃騎大將軍封虢國公十四年邕州賊帥梁大  
海擁賓橫等數州反叛思勗又統兵討之生擒梁大海等三千餘人斬  
餘黨二萬餘級復積屍爲京觀十六年瀧州首領陳行範何遊魯馮  
璘等聚徒作亂陷四十餘城行範自稱帝遊魯稱定國大將軍璘稱  
南越王割據嶺表詔思勗率永連道等兵及淮南弩手十萬人進討  
兵至瀧州臨陣擒遊魯馮璘斬之行範潛竄深州投雲際盤遼二洞

思昂悉衆攻之生擒行範斬之斬其黨六萬級獲口馬金玉巨萬計思昂性剛決所得俘囚多生剝其面或務髮際掣去頭皮將士已下望風懾憚莫敢仰視故所至立功內給事牛仙童使幽州受張守珪厚賂立宗怒命思昂殺之思昂縛架之數日及探取其心截去手足割肉而啖之其殘酷如此二十八年卒時年八十餘

高力士潘州人本姓馮少闢與同類金剛二人聖曆元年嶺南討擊使李千里進入官則天嘉其黠惠總角脩整令給事左右後因小過撻而逐之內官高延福收爲假子延福出自武三思家力士遂往來三思第歲餘則天復召入禁中隸司宮臺廩食之長六尺五寸性謹密能傳詔勅授官闡丞景龍中玄宗在藩力士傾心奉之接以恩顧及唐隆平內難昇諸位奏力士屬內坊日侍左右擢授朝散大夫內給事先天中預誅蕭岑等功超拜銀青光祿大夫行內侍同正員開元初加右監門衛將軍知內侍省事玄宗尊重官闡中官稍稱旨即授三品將軍門施葵戟故楊思昂黎勣仁林

招隱尹鳳祥等貴寵與力士等楊則持節討伐黎林則奉使宣傳  
尹則主書院其餘孫六韓莊楊八牛仙童劉奉廷王承恩張道斌  
李大宜朱光輝郭全邊令誠等殿頭供奉監軍入蕃教坊武德主  
當皆爲委任之務監軍則權過節度出使則列郡辟易其郡縣  
豐贍中官一至軍則所糗千萬計脩功德市鳥獸詣一處則不啻千  
貫皆在力士可否故帝城中甲第繼旬上田集園池沼中官參半  
於其間矣每四方進奏文表必先呈力士然後進御小事便使之  
玄宗常曰力士當上我寢則穩故常止於宮中稀出外宅若附會  
者想望風彩以冀吹噓竭肝膽者多矣宇文融李林甫李適之蓋  
嘉運韋堅楊慎矜王鉉楊國忠安祿山安思順高仙芝因之而取  
將相高位其餘職不可勝紀肅宗在春宮呼爲二兄諸王公主皆  
呼阿翁駙馬輩呼爲耶力士於寢殿側簾帷中休息殿側亦有院  
中有脩功德處雕瑩璀璨窮極精妙力士謹慎無大過然自宇文  
融已下用權相噬以紊朝綱皆力士之由又與時消息觀其勢

候雖至親愛臨覆敗皆不之救力士義父高延福夫妻正授供奉  
嶺南節度使於潘州求其本母麥氏送長安令兩媼在堂備於甘  
脆金吾大將軍程伯獻與力士結爲兄弟麥氏亡伯獻於靈筵散  
髮具縗絰受賓吊荅十七年贈力士父廣州大都督麥氏越國夫  
人開元初瀛州呂玄晤作吏京師女有姿色力士娶之爲婦擢玄  
晤爲少卿刺史子弟皆爲王傳呂夫人卒葬城東葬禮甚盛中外  
爭致祭贈充溢衢路自第至墓車馬不絕天寶初加力士冠軍大  
將軍右監門衛大將軍進封渤海郡公七載加驃騎大將軍力士  
資產殷厚非王侯能擬於來庭坊造寶壽佛寺興寧坊造華封  
道士觀寶殿珍臺侔於國力於京城西北截灋水作碾並轉五輪  
日破麥三百斛初寶壽寺鍾成力士齋慶之舉朝畢至凡擊鍾者  
一擊百千有規其意者擊至二十杵少尚十杵其後又有華州素思  
藝特承恩顧然力士巧密人悅之思藝驕倨人士疎懼之十四載  
置內侍省內侍監兩負秩正三品以力士思藝對任之玄宗幸蜀思

藝走投祿山力士從幸成都進封齊國公從上皇還京加開府儀  
同三司賜實封五百戶上元元年八月上皇移居西內甘露殿力士  
與內官王承恩魏悅等因侍上皇登長慶樓爲李輔國所搆配流  
黔中道力士至巫州地多薺而不食因感傷而詠之曰兩京作斤  
賣五谿無人採夷夏雖不同氣味終不改寶應元年三月會赦歸  
至卽州遇涿人言京國事始知上皇猷代力士北望號慟歐血而  
卒代宗以其耆宿保護先朝贈揚州大都督陪葬泰陵

李輔國本名靜忠閑厰馬家小兒少爲閹貌陋粗知書計爲僕事  
高力士年且四十餘令掌厰中簿籍天寶中閑厰使王鉷嘉其畜  
牧之能薦入東宮祿山之亂玄宗幸蜀輔國侍太子扈從至馬嵬  
誅楊國忠輔國獻計太子請分玄宗麾下兵北趨朔方以圖興復  
輔國從至靈武勸太子即帝位以系人心肅宗即位擢爲太子家  
令判元帥府行軍司馬事以心腹委之仍賜名護國四方奏事御  
前符印軍號一以委之輔國不茹葷血常爲僧行視事之隙手持

念珠人皆信以爲善從幸鳳翔授太子詹事改名輔國肅宗還京  
拜殿中監閑廐五坊宮苑營田栽接摠監等使又兼隴右羣牧京  
畿鑄錢長春官等使勾當少府殿中二監都使至德二年十二月加  
開府儀同三司進封邠國公食實封五百戶宰臣百司不時奏事  
皆因輔國上使常在銀臺門受事置察事廳子數十人官吏有  
小過無不同知即加推訊府縣按鞫三司制獄必詣輔國取決隨  
意區分皆稱制勅無敢異議者每出則甲士數百人衛從中貴人  
不敢呼其官但呼五郎宰相李揆山東甲族位居台輔見輔國執  
子弟之禮謂之五父肅宗又爲輔國娶故吏部侍郎元希聲姪擢  
女爲妻擢弟挹時並引入臺省擢爲梁州長史輔國判元帥行軍  
司馬專掌禁兵賜內宅居止上皇自蜀還京居興慶宮肅宗自夾  
城中起居上皇時召伶官奏樂持盈公主往來宮中輔國常陰候  
其隙而閒之上元元年上皇嘗登長慶樓與公主語劍南奏事官  
過朝謁上皇令公主及如仙媛作主人輔國起微賤貴達日近不

爲上皇左右所禮慮恩顧或裴乃潛畫奇謀以自固因持盈待  
客乃奏云南內有異謀矯詔移上皇居西內送持盈於玉眞觀高  
力士等皆坐流竄二年八月拜兵部尚書餘官如故詔群臣於尚書省送  
上賜御府酒饌太常樂武士戎服夾道朝列畢會輔國驕恣日甚求爲宰  
臣肅宗曰以公勲力何官不可但未允朝望如何輔國諷僕射裴冕聯章  
薦已肅宗密謂宰相臣蕭華曰輔國欲帶平章事卿等欲有章薦信  
乎華不對問裴冕曰初無此事吾臂可截宰相不可得也華復入  
奏上喜曰冕固堪大用輔國銜之實應元年四月肅宗寢疾宰相  
等不可謁見輔國誣奏華專權請黜之上不許輔國固請不已  
乃罷華知政事守禮部尚書及帝崩華竟被斥逐代宗即位輔國  
與程元振有定策功愈恣橫私奏曰大家但內裏坐外事聽老奴  
處置代宗怒其不遜以方握禁軍不欲遽責乃尊爲尚父政無巨  
細皆委叅決五月加司空中書令食實封八百戶程元振欲奪其  
權請上漸加禁制乘其有閒乃罷輔國判元帥行軍事其閑殿

已下使名並分授諸貴仍移居外輔國始懼茫然失據詔進封博陸王罷中書令許朝朝望輔國欲入中書脩謝表聞吏止之曰尚父罷相不合復入此門乃氣憤而言曰老奴死罪事郎君不了請於地下事先帝上猶優詔答之十月十八日夜盜入輔國第殺輔國携首臂而去詔刻木首葬之仍贈太傅

程元振以宦者直內侍省累遷至內射生使寶應末肅宗晏駕張皇后與太子有怨恐不附已引越王係入宮欲令監國元振知其謀密告李輔國乃挾太子誅越王并其黨與代宗即位以功拜飛龍副使右監門將軍上柱國知內侍省事尋代輔國判元帥行軍司馬專制禁兵加鎮軍大將軍右監門衛大將軍封保定縣侯充寶應軍使九月加驃騎大將軍封邠國公贈其父元貞司空母郗氏趙國夫人是時元振之權甚於輔國軍中呼爲十郎元振常請託於襄陽節度使來瑱瑱不從及元振握權徵瑱入朝瑱遷延不至廣德元年破裴茂遂入朝拜兵部尚書元振欲報私憾誣



瑱之罪責坐誅宰臣裴冕爲肅宗山陵使有事與元振相違乃發  
小吏賊私貶冕施州刺史來瑱名將裴冕元勳三人旣被誣陷天  
下方鎮皆解體元振猶以驕豪自處不顧物議九月吐蕃党項入  
犯京畿下詔徵兵諸道卒無至者十月蕃軍至便橋代宗蒼黃出  
幸陝州賊陷京師府庫蕩盡及至行在太常博士柳伋上疏切諫  
誅元振以謝天下代宗顧人情歸咎乃罷元振官放歸田里家在  
三原十二月車駕還京元振服縗麻於車中入京城以規仕用與御  
史大夫王昌齡飲酒爲御史所彈詔曰族談錯立法尚不容同惡陰  
謀議當從重有一於此情實難原程元振性惟兇愎質本庸愚  
蕞爾之身合當萬死頃以寬其嚴典念以微勞屈法伸恩放歸田  
里仍乖克己尚未知非旣忘含煦之仁別貯覬覦之望敢爲嘯聚  
仍欲動搖不令之臣共爲睥睨妄談休咎仍懷怨望東兵裹甲變  
服潛行無顧君親將圖不軌按驗皆是無所逃刑首足異門未云  
塞責朕猶不忘薄効再捨罪人特寬斧鉞之誅俾正投荒之典且

長流溱州百姓委京兆府老綱遞送路次州縣老人防援至彼捉  
搦勿許東西縱有非常之赦不在會恩之限凡百寮庶宜體朕懷  
魚朝恩天寶末以宦者入內侍省初爲品官給事黃門性黠惠善  
宣荅通書計至德中常令監軍事九節度討安慶緒於相州不  
立統帥以朝恩爲觀軍容宣慰處置使觀軍容使名自朝恩始  
也以功累加左監門衛大將軍時郭子儀頻立大功當代無出其  
右朝恩妬其功高屢行間諜子儀悉心奉上殊不介意肅宗英悟  
特察其心故朝恩之間不行自相州之敗史思明再陷河洛朝恩  
常統禁軍鎮陝以殿東夏廣德元年西蕃入犯京畿代宗幸陝時  
禁軍不集徵召離散比至華陰朝恩大軍遽至迎奉六師方振繇  
是深加寵異改爲天下觀軍容宣慰處置使時四方未寧萬務事  
殷上方注意勲臣朝恩專典神策軍出入禁中賞賜無筭朝恩性  
本凡劣恃勲自伐靡所忌憚時引腐儒及輕薄文士於門下講  
授經籍作爲文章粗能把筆釋義乃大言於朝士之中自爲有文

武才幹以邀恩寵上優遇之加判國子監事光祿鴻臚禮賓內飛  
龍閑殿等使赴國子監視事特詔宰臣百寮六軍將軍送上京北  
府造食教坊賜樂大臣羣官二百餘人皆以本官備章服充附學  
生列於監之廊下待詔給錢萬貫充食本以附學生厨料朝恩恣  
橫求取無厭凡有奏請以必允爲度幸臣未有其比大曆二年朝  
恩獻通化門外賜莊爲寺以資章劄太后冥福仍請以章劄爲名  
復加興造窮極壯麗以城中材木不足充費乃奏壞曲江亭館華  
清宮觀樓及百司行廨將相役官宅給其用土木之役僅逾萬億  
三年譴判國子監事加韓國公章劄太后忌日百寮於興唐寺行  
香朝恩置齋饌於寺外之車坊延宰臣百寮就食朝恩恣口談時  
政公卿惕息戶部郎中相里造殿中侍御史李衍以正言折之朝  
恩不悅乃罷會後嘗釋奠於國子監宰臣百寮皆會朝恩講易涉  
鼎卦覆餗之義以譏元載載心銜之陰圖除去之以朝恩太橫亦  
惡之載欲伺其便巧中傷之乃用腹心崔昭爲京兆尹伺朝恩出

處昭不恡財賂潛與朝恩黨陝州觀察使皇甫溫相結溫與昭協自是朝恩動靜載皆知之巨細悉以聞上益怒朝恩未之察日以驕橫載奏加朝恩實封又加皇甫溫權位以肆其欲五年朝恩所昵武將劉希暹微有過忤上諷之詔罷朝恩觀軍容使加實封通前一千戶朝恩始疑然每朝謁恩顧如常亦不以載為意會寒食宴近臣朝恩入謁先是每宴罷必出還營是日有詔留之朝恩始懼言頗悖慢上亦以舊恩不之責是日朝恩還第雉經而卒劉希暹亦下獄賜死

希暹出自戎伍有膂力形貌光偉以騎射聞朝恩用之為神策都虞候封交河郡王善候朝恩意旨深被委信累遷至太僕卿與兵馬使王駕鶴同掌禁兵所為不法諷朝恩於北軍置獄召坊市兇惡少年羅織城內富人誣以違法捕置獄中忍酷考訊錄其家產並沒於軍或有舉選之士財貨稍殷客於旅舍遇橫死者非一坊市苦之謂之入地牢捕帥者有賈明觀者尤凶蠹以屢置大

獄家產巨萬希暹黨之地在禁密人無敢言者朝恩死上寬宥之以素志非順慮不見容常自疑懼與王駕鶴聯職希暹辭多不遜駕鶴純謹上信任之至是以希暹語上聞乃誅之

賈明觀者本萬年縣捕賊吏事希暹恣爲兇惡毒甚犴狼朝恩希暹旣死元載復受希暹姦謀潛容之特奏令江西効力明觀將出城百姓數萬人懷塲石候之載令市吏止約明觀在洪州二年觀察使魏少遊容之及路嗣恭代少遊至郡之日召明觀笞殺之識者減魏之名多路之正朝恩素待禮部尚書裴士淹戶部侍郎判度支弟五琦二人亦坐貶官

竇文場霍仙鳴者始在東宮事德宗初魚朝恩誅後內官不復典兵德宗以親軍委白志貞志貞多納豪民賂補爲軍士取其傭直身無在軍者但以名籍請給而已涇師之亂帝召禁軍禦賊志貞召集無素是時並無至者唯文場仙鳴率諸宦者及親王左右從行志貞貶官左右禁旅悉委文場主之從幸山南兩軍漸集德

宗還京頗忌宿將凡握兵多者悉罷之禁旅文場仙鳴分統焉貞元十二年六月特立護軍中尉兩員中護軍兩員以帥禁軍乃以文場爲左神策護軍中尉仙鳴爲右神策護軍中尉右神威軍使張尚進爲右神策中護軍內謁者監焦希望爲左神策中護軍自文場等始也時竇霍之權振於天下藩鎮節將多出禁軍臺省清要時出其門文場累加驃騎大將軍是歲仙鳴病帝賜馬十匹令於諸寺爲僧齋以祈福久病不愈十四年蒼卒而卒上疑左右小使正將食手加毒配沐者數十人仙鳴死後以開府內常侍第五守亮爲右軍中尉文場連表請致仕許之十五年已後楊志廉孫榮義爲左右軍中尉亦踵竇霍之事怙寵驕恣貪利冒寵之徒利其納賄多附麗之至於貞元末宦官復盛順宗即位王叔文用事與韋執誼謀奪神策軍權乃用宿將范希朝爲京西北禁軍都將事未行爲內官俱文珍等所排叔文貶而止

俱文珍貞元末宦官後從義父姓曰劉貞亮性忠正剛蹈義順宗

即位風病不能視朝政而宦官李忠言與牛美人侍病美人受旨於帝復宣之於忠言忠言受之王叔文叔文與朝士柳宗元劉禹錫韓日華等圖議然後下中書俾韋執誼施行故王之權振天下叔文欲奪宦者兵權每忠言宣命內臣無敢言者唯貞亮建議與之爭知其朋徒熾慮曠朝政乃與中官劉光琦薛文珍尚衍解王等謀奏請立廣陵王爲皇太子勾當軍國大事順宗可之貞亮遂召學士衛次公鄭絪李程王涯入金鑾殿草立儲君詔及太子受內禪盡逐叔文之黨政事悉委舊臣時議嘉貞亮之忠盡累遷至右衛大將軍知內侍省事元和八年卒憲宗思其翊戴之功贈開府儀同三司

吐突承璀幼以小黃門直東宮性敏惠有才幹憲宗即位授內常侍知內省事左監門將軍俄授左軍中尉功德使四年王承宗叛詔以承璀爲河中河南浙西宣歙等道赴鎮州行營兵馬招討等使內侍省常侍宋惟澄爲河南陝州河陽已來館驛使內官

曹進玉劉國珍馬江朝等分爲河北行營糧料館驛等使諫官御史上疏相屬皆言自古無中貴人爲兵馬統帥者補闕獨孤郁段平仲尤激切憲宗不獲已改爲充鎮州已來招撫處置等使及承璀率禁軍上路帝御通化門樓慰諭遣之出師經年無功乃遣密人告王承宗令上疏待罪許以罷兵爲解仍奏昭義節度使盧從史素與賊通許爲承宗求節鉞乃誘潞州牙將烏重胤謀執從史送京師及承宗表至朝廷議罷兵承璀班師仍爲禁軍中尉段平仲抗疏極論承璀輕謀弊賦請斬之以謝天下憲宗不獲已降爲軍器使俄復爲左衛上將軍知內侍省事時弓箭庫使劉希先取羽林大將軍孫璿錢二十萬以求方鎮事發賜死辭相告訐事連承璀乃出爲淮南節度監軍使太子通事舍人李涉性狂險投匭上書論希先承璀無罪不宜貶戮諫議大夫知匭事孔戣見涉疏之副本不受其章涉持疏於光順門欲進之戣上疏論其纖邪貶涉硤州司倉上待承璀之意未已而宰相李絳在翰林時數論



承璀之過故出之八年欲召承璀還乃罷絳相位承璀還復爲神策中尉惠昭太子薨承璀建議請立澧王寬爲太子憲宗不納立遂王宥穆宗即位銜承璀不佑已誅之愍宗時中尉馬存亮論承璀之冤詔雪之仍令假子士晬以禮收葬

王守澄元和末宦者憲宗疾大漸內官陳弘慶等弑逆憲宗英武威德在人內官祕之不敢除討但云藥發暴崩時守澄與中尉馬進潭梁守謙劉承偕韋元素等定冊立穆宗皇帝長慶中守澄知樞密事初元和中守澄爲徐州監軍遇翼城醫人鄭注出入節度使李愬家注敏悟過人博通典藝甚弄醫卜尤臻於妙人見之者無不歡然注嘗爲李愬煮黃金服一刀圭可痿弱重腿之疾復能反老成童愬與守澄服之頗効守澄知樞密薦引入禁中穆宗待之亦厚注多奇詭每與守澄言必通夕文宗即位守澄爲驃騎大將軍充右軍中尉注復得幸於文宗後依倚守澄大爲蔽弊文宗以元和逆黨尚在其黨大盛心常憤惋端居不怡翰林學士宋

申錫嘗獨對探知上略言其意申錫請漸除其偏帝亦以申錫沉厚有方略爲其事可成乃用爲宰相申錫謀未果爲注所察守澄乃令軍吏豆盧著誣告申錫與漳王謀逆申錫坐貶宰相李逢吉從子訓與注交通訓亦機詭萬端二人情義相得俱爲守澄所重復引訓入禁中爲上講周易旣得幸又探知帝旨復以除宦官謀中帝意帝以訓才辯縱橫以爲其事必捷待以殊寵自流人中用爲學官充侍講學士時仇士良有翊上之功爲守澄所抑位未通顯訓奏用士良分守澄之權乃以士良爲左軍中尉守澄不悅兩相矛盾訓因其惡大和九年帝令內養李好古賁酖賜守澄秘而不發守澄死仍贈揚州大都督其弟守洵爲徐州監軍召還至中牟誅之守澄養訓注反罹其禍人皆使其受佞而惡訓注之陰狡李訓旣殺守澄復惡鄭注乃奏用注爲鳳翔節度使訓欲盡誅宦官乃與金吾將軍韓約新除太原節度使王璠新除邠寧節度使郭行餘權御史中丞李孝本權京兆

尹羅立言謀其年七月二十日上御宣政殿百寮班定韓約不奏平安乃奏曰臣當仗廨內石榴樹夜來降甘露請陛下幸仗舍觀之帝乘輦趨金吾仗中尉仇士良與諸官先往石榴樹觀之伺知其詐又聞幕下兵仗聲蒼黃而還奏曰南衙有變遂扶帝輦入閣門李訓從輦大呼曰邠寧太原之兵何不赴難衛乘輿者人賞百千於是誰何之卒及御史臺從人持兵入宣政殿院宦官死者甚衆輦旣入閣門內官呼萬歲俄而士良等率禁兵五百餘人露刃出東上閣門逢人即殺王涯賈餗舒元興李訓等四人宰相及王璠郭行餘等十一家屍橫闕下自是權歸士良與魚弘志至宣宗即位復誅其甚泰者而閹寺之勢仍握軍權之重焉

田令孜本姓陳咸通中從義父入內侍省爲官者頗知書有謀略自諸司小使監諸鎮用兵累遷神策中尉左監門衛大將軍乾符中盜起關東諸軍誅盜以令孜爲觀軍容制置左右神策護駕十軍等使京師不守從僖宗幸蜀靈輿返正令孜頗有匡佐之功

時令孜威權振天下時關中寇亂初平國用虛竭諸軍不給令孜請以安邑解縣兩池榷鹽課利全隸神策軍詔下河中王重榮抗章論列言使名久例隸當道省賦自有常規令孜怒用王處存爲河中節度使重榮不奉詔令孜率禁軍討之重榮引太原軍爲援戰於沙苑禁軍大敗京師復亂僖宗出幸寶雞又移幸山南方鎮皆憾令孜生事令孜懼引前樞密楊復恭代已從幸梁州求爲西川監軍西川節度使陳敬瑄即令孜之弟也昭宗即位三川大亂詔宰相韋昭度鎮西川陳敬瑄不受代令孜引閬州刺史王建爲援建素以父事令孜時建方亂東川聞其召也以西蜀可圖欣然赴之建以所領千餘兵至漢州陳敬瑄以建雄豪難制辭而不遣之建曰十軍阿父召予及門而拒鄰藩聞之孰肯相容爲予報令公建至此無所歸也遂遣使上表請討陳敬瑄以自効朝廷嘉之即命昭度爲招討入蜀加兵經年無功昭度還京建遂絕棧道不通詔使歲中急擊成都陳敬瑄計窘遣令孜出城與建通和建竟

自爲蜀帥令孜以義父之故依倚仍舊監軍事旣而陳衍瑄遇醜令孜亦爲建所殺

楊復光內常侍楊玄价之養子也幼以宦者入內侍省慷慨負節義有籌略爲小黃門監鎮兵征討乾符中賊渠黃巢之犯江西復光爲排陣使遣判官吳彦宏入城喻朝旨巢即令其將尚君長奉表歸國招討使宋威害其功併兵擊賊巢怒復作剽朝廷誅尚君長怨怒愈深宋威戰敗復光摠其兵權進攻洪州擒賊將徐唐言詔以荆南節度使王鐸爲招討代宋威復光監忠武軍屯于鄧州以遏賊衝京師陷賊節度使周岌授僞命賊使往來旁午岌嘗夜宴急召復光左右曰周公歸賊必謀害內侍不如勿往復光曰事勢如此義不圖全即赴之酒酣岌言本朝事復光因泣下良久曰丈夫所感者恩義不規利害非丈夫也公自匹夫享公侯之貴豈捨十八葉天子而北面臣賊何恩義利害之可言乎聲淚俱發岌亦爲之流涕岌曰吾不能獨力拒賊貌奉而心圖之故召公歷酒爲

盟是夜復光遣其養子守亮殺賊使於傳舍時秦宗權叛及據蔡州復光得忠武之師三千入蔡州說宗權俾同義舉宗權遣將王叔率衆萬人從復光收荆襄次鄧州王叔逗留不進復光斬之併其軍分爲八都廐晏弘晉師秦王建韓建等皆八都之大將也進攻南陽賊將朱溫何勤來逆戰復光敗之進收鄧州獻捷行在中和元年五月也復光乘勝追賊至藍橋丁母憂還尋起復受詔充天下兵馬都監押諸軍入定關輔王重榮爲東面招討使復光以兵會之二年七月至河中賊將朱溫守同州復光遣使諭之九月溫以所部來降時賊將李翔守華州巢寇益盛王重榮憂之謂復光曰臣賊則負國拒戰則兵微今日成敗未可知也公其圖之復光曰鴈門李僕射以雄武振北陲其家尊與吾先世同患難李鴈門奮不顧身自播遷已來徼兵未至者蓋太原阻路也如以朝日諭鄭公詔到其軍至重榮曰善王鐸遣使奉墨詔之太原太原以兵從之及收京城三敗巢賊復光與其子守亮守宗等身先犯難功烈居多

其年六月卒於河中時年四十二復光雖黃門近幸然慷慨有大志  
善撫士卒及死之日軍中慟哭累日身後平賊立功者多是復光部  
下門人故將也諸假子守亮興元節度使守宗忠武節度使守信  
商州防禦使守忠洋州節度使其餘以守爲名者數十人皆爲牧  
守將帥

楊復恭貞元末中尉楊志廉之後志廉子欽義大中朝爲神策中  
尉欽義子三人立翼立价立寔立翼咸通中掌樞密立寔乾符中  
爲右軍中尉立价河陽監軍復恭即立翼子也以父幼爲宦者入  
內侍省知書有學術每監諸鎮兵龐勛之亂監陣有功自河陽監  
軍入爲宣徽使咸通十年立翼卒起復爲樞密使時黃巢犯闕  
左軍中尉田令孜爲天下觀軍容制置使專制中外復恭每事力  
爭得失令孜怒左授復恭飛龍使乃稱疾退於藍田僖宗自蜀還  
京田令孜出師失律車駕再幸山南復用復恭爲樞密使尋代令  
孜爲右軍中尉時行在制置內外經略皆出於復恭車駕還京授

觀軍容使封魏國公僖宗晏駕迎壽王踐祚文德元年加開府金  
吾上將軍專典禁兵旣軍權在手頗擅朝政昭宗惡之政事多訪  
於宰臣故韋昭度張濬杜讓能每有陳奏即舉大中故事稍抑官  
者之權上性明察由是偏聽之疊生焉國舅王瓌頗居中任事復  
恭惡之奏授黔南節度至吉柘江覆舟而沒物議歸咎於復恭上  
每切齒道復恭復恭假子天威軍使守立權勇冠於六軍人皆避  
之上欲罪復恭懼守立爲亂乃謂復恭曰吾要卿家守立在左右  
可進來乃賜姓李名順節恩寵特異勢倖樞要乃與復恭爭權每  
中傷其陰事授順節鎮海軍節度使同平章事大順二年九月詔  
復恭致仕賜杖屨復恭旣失勢欲退止商山別居第在昭化里近  
玉山營假子守信爲玉山軍使守信時候復恭於其第或誣告云  
玉山軍使與復恭謀亂詔李順節率禁軍攻之昭宗御延喜樓  
守信以兵拒之順節屢敗際晚守信復恭挈其族出通化門趨興  
元守信令部將張綰殿其後綰戰敗被擒復恭至興元節度使楊



守亮乃糾合請守義兄弟舉兵以討順節爲名天子詔李茂貞王  
行瑜討之明年守亮兵敗復恭與守亮挈其族將奔太原入商山  
至乾元縣爲華州兵所獲執送京師皆梟首於市李茂貞收興元  
進復恭前後與守亮私書六十紙內訴致仕之由云承天是隋家  
舊業大姓但積粟訓兵不要進奉吾於荆榛中援立壽王有如此  
負心門生天子旣得尊位乃廢定策國老其不遜如是後復恭假  
子彥博奔太原收復恭骸骨葬於介休縣之抱腹山復恭之後  
官者西門重遂爲右軍中尉李茂貞初併山南兵衆強盛干預朝  
政宰相杜謨能與重遂等謀誅之師興爲茂貞所敗重遂被誅乃  
以內官駱全瓘劉景宣爲左右軍中尉乾寧二年春李茂貞王行  
瑜以兵入朝殺宰相韋昭度李谿河東節度使李克用率師渡  
河討邠岐二帥軍於渭北駱全瓘與茂貞宿衛將閻圭脅天子  
幸岐州昭宗蒼黃幸莎城茂貞以太原問罪乃誅全瓘閻圭以  
自解昭宗幸華州官官稍微及光化還宮內官景務脩宋道弼

復專國政宰相崔肖深惡之中外不睦宰相徐彥若王搏有度量  
見其陰險相傾懼危時事嘗奏曰人君當務大體平心御物無有  
偏私偏任徧聽古人所患今中官怙寵道路目之皆知此弊然未  
能卒改俟多難漸平以道消息之陛下勿泄聖謨啓其姦詐崔肖  
知搏所奏頗銜之他日見上曰王搏姦邪已爲勅使外應不可在  
相位二年六月貶搏官賜死於藍田道弼務脩亦賜死以樞密使  
劉季述王奉先爲兩軍中尉出徐彥若鎮南海崔肖秉政而排擯  
宦官季述等外結藩侯以爲黨援十一月六日季述矯詔以皇太  
子監國遂廢昭宗居東內奪傳國寶授太子昭宗以何皇后宮嬪  
數人隨行幽于東宮季述手持銀撾於上前以撾畫地數上罪狀  
云某時某事你不從我言其罪一也其悖逆如此乃令李師虔以  
兵圍之鎔錫鑄其局鑄時方凝冽嬪御無被哭聲聞于外穴牆通  
食者兩月十二月晦崔肖等謀反正誅季述奉先復迎昭宗即位  
改元天復元年其歲十一月朱全忠寇河中華州陷之京師振恐

中尉韓全誨請上且幸鳳翔全忠追逼乘輿兵圍鳳翔者累年三年正月茂貞殺兩軍中尉韓全誨張弘彥樞密使袁易簡周勣客等三十二人皆斬首以布囊貯之令學士薛貽矩送於全忠求和是月全忠迎駕還長安詔以崔胤爲宰相兼判六軍諸衛胤奏曰高祖太宗承平時無內官典軍放自天寶已後宦官竊盛貞元元和分羽林衛爲左右神策軍以使衛從令宦官主之唯以三千人爲定制自是叅掌樞密由是內務百司皆歸宦者上下彌縫共爲不法大則傾覆朝政小則構扇藩方車駕頻致播遷朝廷漸加微弱原其禍作始自中人自先帝臨御已來陛下纂承之後朋儕日熾交亂朝綱此不翦其本根終爲國之蝨賊內諸司使務宦官主者望一切罷之諸道監軍使並追赴闕廷即國家萬世之便也詔曰宦官之興肇于秦漢趙高閭樂育滅嬴宗張讓段珪遂傾劉祚肆其志則國必受禍悟其事則運可延長朕所以斷在不疑祈天永命者也先皇帝嗣位之始年在幼沖羣賢相推奄專大政於是毒

流宇內兵起山東遷幸三川幾淪神器迴鑒之始率土思安而田  
令孜妬能忌功遷搖近鎮陳倉播越患難相仍洎朕纂承益相  
侮慢復恭重遂逞其禍道弼季述繼其兇幽辱朕躬凌脅孺子天  
復返正罪已求安兩軍內樞一切假借韓全誨等每懷憤惋曾務  
報讎視將相若血仇輕君上如木偶未周星歲竟致播遷及在岐  
陽過於羈紲上憂宗社傾墜下痛民庶流離茫然孤居無所控告  
全忠位兼二柄深識朕心駐兵近及於三年獨斷方誅於元惡今  
謝罪郊廟即宅宮闈正刑當在於事初除惡宜絕其根本先朝及  
朕五致播遷王畿之貲減耗太半父不能庇子夫不能室妻言念于  
茲痛深骨髓其誰之罪爾輩之由帝王之為治也內有宰輔卿士  
外有藩翰大臣豈可令刑餘之人叅預大政況此輩皆朕之家臣  
也比於人臣之家則奴隸之流恣橫如此罪惡貫盈天命誅之罪豈  
能捨橫屍伏法固不足矜含容久之亦所多愧其第五可範已下  
並宜賜死其在畿甸同華河中並盡底處置訖諸道監軍使已下

及管內經過并居停內使勅到並仰隨處誅夷訖聞奏已令準國  
朝故事量留三十人各賜黃絹衫一領以備宮內指使仍不得輒有  
養男其左右神策軍並令停廢是日諸司宦官百餘人及隨駕鳳  
翔羣小又二百餘人一時斬首於內侍省血流塗地及宮人宋柔等  
十一人兩街僧道與內官相善者二十餘人並笞死於京北府內  
諸司一切罷之皆歸省寺自是京城並無宦官天子每宣傳詔命  
即令宮人出入崔杼雖復仇快志國祚旋亦覆亡悲夫  
贊曰崇墉大厦壯其楹礎殿邦禦侮亦俟明德宵人意褊動不  
量力投鼠敗器良堪太息

唐書列傳卷第二百三十四

左奉議郎元紹興府府學教授朱倬校正